





空明子文集目錄

上卷

春遊賦

述夢賦

感舊賦

徵君張樸村先生傳

教授郭述堂先生傳

廣文王虛亭先生傳

菱村先生傳

郭南江印山堂稿叙

慎微上人詩叙

空明子七十不受賀叙

五松圖解


下卷

容膝齋記

狐鬼記

馴狗記

雌雞村記





空明子文集目錄  
睡香花記

臯羽記

游僧潘十四記

哀山頭辭

毀譽無定

猴報

老蚌說

討逆孽吳姓檄文

答討匿名檄文

答討匿名某氏檄文

先塋考畧

空明子文集卷上

華亭張榮景桓著

婿戴宣晴江較

春遊賦

空明子年至古稀寸陰是惜布衣疏食無假矯飾病餘  
杜門謝絕賓客筋骨頓衰鬚髯盡白食不甘味臥不安  
席呼兆熊而來前商娛老之良策兆熊長跪酒斟琥珀  
滿飲此觴庶幾安適設或未能茶香凝碧連進七椀風  
生兩腋苟其不爾或道或釋暢談世外以樂晨夕抑更  
不然重門洞闢長嘯一聲攄我肝膈空明曰否非爾能  
億索性不飲欲飲不克燥能健脾那堪水厄二氏之學  
我道之賊世情好諛人心惡直與其開口不如守默再



四躑躅得我樂國方春色之芳菲堪踏青於阡陌麗景  
絢爛兮溪南晴光搖漾兮山北命童子岸我幘攜我筇  
蠟我屐駕一葉之扁舟泛吾家之安宅於是襲輕衣載  
圖籍經泗水之紆迴候蒲漚之潮汐望古刹於江濱渡  
春申之故迹蝴蝶低飛兮飄香鷓鴣高舉兮灑墨藤花  
滿堤紅黃間植麥秋成浪光彩潤澤新鶯初轉兮喬木  
之陰鴉鵲爭巢兮古廟之相對百五之芳辰悵白駒之  
過隙維時節屆暮春遊人悅懌風和景明不殊疇昔七  
十年來有同一擲訪故交於陋巷奈晨星之變易懷伊  
人於天末弔雁影之孤隻立事等於碁局類奕秋之一  
奕言至簫山僅存頑石竹箭徒傳山荒寂寂幸村落之

環遶事西疇於日昃偶步草菴山僧潛匿因託鉢之無  
門致三旬而九食祇偃仰於匡牀苦酬應之乏力再往  
澱湖水天一色淼淼茫茫四望無極西來震澤兮勢若  
傾東注滄海兮形如仄看孤鶴之唳天而愁難渡兮何  
不巢喬松而早斂此倦翮空明子似有得戒舟師無急  
迫理歸橈傍鄉僻桃花吐豔兮風漸微楊柳拖金兮日  
欲赤鴛鴦泳游兮樂此中流牛羊下來兮臥此疆場吠  
犬昂頭鳴雞鼓翼竹搖夾岸之竿雲鎖遠山之脊飲佳  
弟之名園奕山弟  
留飲喜三珠之英特奕山弟  
三子發夜光而直  
上自能煥耀於斗牛之側旋反家園候門不忒賓朋滿  
堂往來若織愧敬謝而未遑奚威儀之抑抑畏揖讓之



徒勞幸潛踪而少息喜微疴之盡捐庶此遊之有益

述夢賦

有序

丁未夏午睡魔作祟偃仰在牀倏得異夢初入一境宛若渡海山川秀麗城郭完好綠陰交蔭人物都雅但見青旂載道飛蓋飄揚輿馬之多僕隸之盛路阻且修竹木暢茂故家甲第巨鎮聯綿不勝屈指渡河梁入廛市登堂撫琴鶴鹿跳舞其下有通名而請見者則皆鄒枚賈董輩也越日有事從禽持弓挾矢者又累累若若日復一日忽欲作歸計諸人挽留不得隨上巨艦順風揚帆誤漂鬼國陰風鑱人肌骨寒戰魑魅魍魎莫可名狀膽慄心煩求脫不得方困苦之際忽聞迅雷一震諸鬼殛盡而予夢方醒因憶從前始至崇川輿情歡洽及歸



里後日與鬼混若滎陽之獨足隴西之九頭河間之浪  
婦潁川之妖尼汝南之兩頭蛇吳興之比翼鳥清河之  
四豹延陵之五狼皆能逞彼伎倆亂我心曲天誘其衷  
同時漸滅即有餘魂剩魄亦不過奄奄殘喘待斃而已  
又何異此一夢哉因作述夢賦以志異其辭曰

嗟四時之代謝看兩曜之迭更枕南窗而高臥俄一夢  
之欲成不覺跨滄海游蓬瀛北峙金鰲之嶺南環碧玉  
之城岸排青雀之舫樹鼓黃鸝之笙爰渡溪橋轉林麓  
飛蓋逐風青旗捲綠望者昂頭行者側足一呼百應聲  
動巖谷悵道里之阻修嘆故家之喬木爾乃上高軒坐  
華屋清風滿堂桐陰若沐論文則潘陸爭先講武則孫

吳競逐曾日月之幾何奈歸思之迫促於是乘風破浪  
勢同落鷗頃刻萬里誤漂羅刹陰風四來不見日月奚  
囊引人寧野害瞎佚陽超騰方徨跳越賓滿赤珠黎邱  
狡猾修車遠遊大豕奔突恨佩劍之韜光致儻儻之恍  
惚忽雷霆之怒號殲奇鬼於窮髮夢顛倒而將醒意朦  
朧而未達



感舊賦 有序

感舊賦者懷四君子也四君子柳介趙君含美陳君漢  
留董君端臣許君或以德表見或以文擅長皆西方之  
美人也悵然與感作此哀之

步崔嵬兮瑤臺高氏別業望美人兮不來泛瑤潭兮一曲嗟

半閣董君讀書處之崩頽經高陽之故里痛玉樹之久埋弔

花溪兮寂寞亦靖節之堪哀趙君愛菊最喜陶詩故人以淵明稱之寄豪

情於詩酒悵吟室陳君吟嘯處之蒿萊憶四君而興嘆空竚

立於蒼苔痛鳳毛之不繼紛紛徒見白楊之滾塵埃



徵君張樸村先生傳

徵君與予同姓諱雲章字漢瞻號倬菴別號樸村因舍後有樸樹三株可二百年物徵君晚年日夕婆娑其下故取以自號也。立居嘉定縣之橫港高曾兩代家富於財有德桑梓以耕讀立其業祖原修公父雯來公俱能有聲膠序名噪一時。母夫人李太君嘗夢大星觸懷而生公公三四歲時矯矯自異不與凡兒等端重沉潛言笑不苟見者卜其大器。十四歲遇奎宿於小樓之上聲色不稍動尊大人教以太史公書唐宋諸大家文受而雜誦疊疊無倦容。由是精專古學雖有明三百年來及本朝之制藝未嘗不殫心竭慮以揣摩之。每作一篇鏤



肝刻膽驚人耳目然公之意雅不在此後應童子試感  
時文之弊乃取試卷上書督學使者歷言古今文之得  
失時人無不咋舌學使者不忤也予聞而異之始識面  
遂訂交焉公旋返練川予遂往金陵應試放榜後句容  
令董公爲予言場中得而復失之故公知之爲作詩以  
相慰孰知予之淡於得失乎公聞之益喜雖地隔百里  
外音問遼濶然立名節羞奔競兩心如一心也公又疊  
遭大變執喪九載淚盡血枯幾致失明水漿不入口者  
旬日李太君勸之曰九泉之下毋傷而父心於是勉進  
一餐依依膝下支撐門戶惟恐家聲之墜撫弟妹以恩  
及時嫁娶無奈德日高學日富而家獨日落食指浩繁

以致日中嘗未能舉火不得已走京師遊太學作餬口  
四方之計是時玉峰徐氏操海內文柄耳公之名已久  
重公之文行羅而致之上館新城王公時爲大司成昌  
言於衆曰今天下求如生之古文者實鮮又云學不干  
祿能志於古者莫如此生公之名自此滿天下孰知非  
公之所好也意謂儒者不得與聞斯道不可以爲人因  
從陸稼書先生游求學術之辨得洞晰陽明非正學獨  
究心於朱子及濂洛關閩諸家之書鑽研反覆窮理盡  
性格物致知不惟登其堂且入其室矣後遭母夫人之  
喪居廬三年鬚髮白盡長號一聲聞者流涕及禫猶不  
肯進肉汁其至性之過人如此生前之坐必侍立必扶



探嗜好以勸加餐祈減已算以益母壽孝行豈能屈指  
數哉乙未 徵天下巖穴之士撫軍力爲勸駕到京之  
日不接一客不通一刺齋戒沐浴繕成一疏以備 顧  
問久之事寢因長嘆曰我之不遇命也濡滯觀望失徵  
士品矣歸志浩然適王華亭有總裁纂修尚書之局以  
公經學湛深能發明千聖之道列名薦之於 上而委  
以纂館局告竣旋辭議叙即同幼子孝廉君道營出  
國門道由通州張儀封固留之建書院於潞河之旁以  
來學者使畿輔士子有所矜式義不容辭懸朱子畫像  
於講堂率來學之士行釋菜禮隨時課菽訓諸生曰守  
正誼不謀利明道不計功十字做去便認清程朱門戶

又須立定脚跟勿依人步趨流入王陸之學語言文字  
毋離經畔道惟歸理醇氣昌而已一年之內四方之從  
游者接踵而至士風興起理學昌明斌斌乎大有可觀  
矣孰料壬寅春公又遭鼓盆之厄乎公聞訃黯然神傷  
久之曰我老矣亦欲作歸計士子遮道扳轅挽留不得  
灑淚而別旣歸杜門不出癸卯 新天子嗣位大僚又  
欲以賢良方正起公公固辭不受優游與及門之士勉  
之以希賢希聖孫子輩教之以學詩學禮如是者又兩  
年丙午春扁舟顧我相對歡然因曰一生不得志我與  
君同也弗肯隨時俯仰我與君同也不負所學我與君  
同也稍有著述我與君同也白頭兄弟聚首良難此則



不能必之於天者也我其衰矣予曰毋煩言兄能爲我書崇川歸里圖乎能爲兆熊書六齡灑翰圖乎能爲兒輩書格言一兩條乎公連聲曰能能濡墨染翰一揮立就予謂兆熊曰此至寶也謹藏之談至漏盡而別季夏偶至後圃見樸樹枯萎嘆曰命矣夫家人驚問故徐曰行期將至何問爲未幾七月中果卒卒之日門人私謚曰端文先生或問於予曰公得力在何處予曰大都學曾之省身孟之養氣程朱之居敬又問曰工夫到恁樣地位予曰理學則較勝明人經濟則高出宋儒雖未見知於人而其才全德備有不可掩沒者凡其出諸口而措諸事無不本於先聖先賢之道不假勉強漸近自然

設遇聖人以陶鎔之當在曾閔游夏之列豈尋常貌似者可同日語哉今讀公之樸村集明體達用無所不包顏之簞瓢陋巷尹之致主澤民盡在是編惜乎老於諸生弗克展其抱負爲可慨也再閱歸里灑翰兩圖而嘆其筆力蒼古不落蹊徑尤可想見其特立獨行之概已碩果僅存倏焉凋謝興言及此能無物在人亡之感耶是爲傳



教授郭述堂先生傳

於戲述堂司鐸雲間將及六載誰復有知述堂者乎知之者祇有二三君子及門諸生而已第及門之重述堂者以文而二三君子之重述堂者以行若以文論述堂未第以前文名滿天下四方之負笈者固多旣第以後一時之從游者益衆俱不過專攻舉子業爲弋取科名之計若以行論知己良難即如從前家食之時半生淪落能重述堂之高風欽述堂之道範者舍李厚菴仇滄柱胡京蒙而外寥寥何不少概見也後至雲間稱莫逆者亦止予與王範之兩人已耳然範之之知述堂者猶淺而予之知述堂者獨浚述堂之事兩尊人也雖就館



於外甘旨畢備異味必供冬裘夏葛經時預辦婉容愉  
色出自孺慕之誠流露於外其孝於親者若此又能體  
親之心推愛宗族團聚孤嫠生養死葬更能不私已有  
廣親之愛周旋姻婭濟困扶危寡婦孤兒賴以完全名  
節者纍纍若若無倦容無德色歲以爲常設使膺廣土  
衆民之任其已溺已饑當更何如也若述堂者古人中  
猶不多得况今人乎在官日不輕然諾不苟取予一塵  
弗染胥吏苦之故其告致也有若或勸之而又有若或  
擠之者予雖百計留之而述堂之去志決不可挽回矣  
去之日兩袖清風翩然就道河梁遠送四目交橫不知  
涕之何從生也臨別猶執小兒兆熊手曰子天姿高邁

蜚鳴必蚤入都便道枉顧草廬莫我遐棄一慰老懷其  
惓惓情狀至今如在目前也述堂郭姓諱嗣齡字引年  
述堂其別號也總之述堂一生嚴氣正性動循禮法事  
親孝交友誠居官廉處家儉耻奔競立名節暗室勿欺  
衾影無愧真堪俎豆宮牆與陸稼書先生後先輝映誠  
如史靜菴所云行將以引年重科目不屑以科目重引  
年也名言哉至其入闈考校之得人文章之超前絕後  
有目共賞自足千古又奚待予贅哉



廣文王虛亭先生傳

讀書不讀異書不可謂讀書識字不識難字不可謂識字作文不作奇文不可謂作文夫十三經念一史本非異書也今之攻舉業者概置不閱束之高閣非惟不能讀其書且亦不能舉其目雖眼前之書得不謂之異書乎而虛亭能讀之四聲六義載在典籍本無難字也今之攻舉業者因師承之誤嬾於校訂非惟不能正其音無亦不能明其義雖平常之字得不謂之難字乎而虛亭能識之闡揚聖學摹寫萬物亦非奇文也今之攻舉業者勦襲腐爛熟抄帖括亦有高自許可硬寫子書一兩句以博淹雅非惟不能宣其理兼亦不能達其辭雖



意中之文得不謂之奇文乎而虛亭能作之所以幾十年來聲名籍籍良有以也虛亭姓王氏諱鑄字範之幼失所怙餬口硯田奉母至孝出必稟命問所欲入必長跪請安而後起朝夕供甘旨無缺或貧不能辦者必竭力以圖進不使母夫人知之交友尚直道肝膽氣誼爲一時冠然亦有直而過當處觸犯忌諱爲惡少所毆斂容謝之弗校也師道最嚴不稍寬假弟子之出其門下者率多名士約束子弟尤謹鄉黨推重有司下車之始無有不式其廬者晚年得子頗衆稍事姑息長君次君雖能讀父書而體常患弱年老多病館穀半荒衆口嗷嗷衣食難繼愁窘之中次君夭折有懷莫告一慟而亡

嗚呼已矣無復言矣幸存長君以延書香之一線豈料不兩月而又溘焉長逝耶文人無命一至於此嗟乎使虛亭當少壯之日一蜚冲天自能作絕大文章立不朽功業爲我道光而竟淪落不偶賫志以歿又絕其文嗣天耶人耶我不得而知請還質之虛亭不知冥冥中虛亭亦能知之否也



菱村先生傳

菱村先生者隱姓名不知何許人館於菱村以菱村自號人亦以菱村先生目之精深字義正聲音不陰陽辨體用問奇者戶外常滿開門受徒從游者衆一方之名士多出其門下環舍俱植竹木名花奇卉四時不絕愛作小詩墨跡未乾即爲人竊去喜飲酒飲必徐徐弗豪飲弗狂飲終席鮮醉意雖有號稱能飲者未能或之勝也年甚高鬚髮斑白與人談笑自朝至暮無倦容冬日擁爐吟嘯坐臥一室夏則於竹林下披芰荷衣握蒲葵扇逍遙物外望見之者疑爲神仙中人如是者數十年一日無病而卒卒之日顏若平生旣歛葬於北山之麓



題曰菱村之墓門人私謚曰和介先生嗚呼菱村不歿矣

郭南江印山堂稿叙

文有一定乎哉無一定也文遂無一定乎哉文到至處  
究竟有一定之聲價也維揚南江郭世兄予至交述堂  
先生令嗣也髫齡穎敷樹幟文壇蜚聲鬢序歷有年所  
癸卯始受知於崑圃黃先生凡同人之讀其闡墨及歷  
試諸作無不嘖嘖詫爲異事予曰江左人品學問無而  
有之者定推述堂先生爲第一先生昆季五人夙負海  
內重望青箱並業其素所授受不差毫末也又烏足異  
憶予之與述堂先生交也自壬寅始而予之與述堂先  
生神交也已在四十年之前間嘗讀其文想其人地隔  
千里覲面良難高山仰止夢寐以之又不自壬寅始也



自壬寅冬先生以名進士教授雲間時相過從私心竊  
幸士品之端文風之盛不難復見於今日爰命八齡熊  
兒執贄門下方期日就月將步趨芳躅得追隨於南江  
袖清風追蹤前哲挽留不得覺涕淚之潛潛也南江  
在兄於臨行時以印山堂稿問叙於予予戲答之曰臣  
之壯也猶不如人今老矣無能爲也已在兄又囑之者  
再予受而讀之但覺其筆無點塵語多別致天馬行空  
不受羈勒命意極其高運筆極其秀立局極其異鍊句  
極其工談理極其密取材極其新此皆述堂先生之家  
學也嗚呼南江之文自能傳在行遠又奚待予叙哉况

其事親以孝交友以誠恂恂儒雅對之如飲醇醪焉謝  
庭玉樹本自不同議論丰采尤足推倒一在將來登金  
馬入玉堂必能本其家學振起頽風昭示來茲式光前  
業使天下後在知所矜式共曉然於文到至處原有是  
一定之聲價也不券可卜予將拭目以待之華亭年家  
世弟張榮桓氏拜草



慎微上人詩序

慎微上人者予方外友也有德有行有詩名有經濟才歿之日以其遺稿囑其高弟對清請叙於予且曰空明先生知我非先生亦不能叙我詩既歿對清修誠而至持其遺稿含淚而道其所以予念上人之誠且喜對清之能克成先志於是欣然受命憶予之於上人交也自含美陳先生始含美嘗稱上人能詩予意中不過知其爲詩僧而已後晤柳介趙先生先生深於理學兼工於詩忽向予曰西方有異僧焉與予交最久知最深聯牀風雨晨夕與俱見其議論精卓文采煥發知慧高人數倍真曠代逸才也不得僅以詩僧目之予曰異哉上人



果能若是乎從此時相往來遂定交焉所可異者上人喜詩而不言詩能詩而不恒作詩人以此疑之予曰世不知上人而予獨知之夫上人之於詩鉤深致遠探索無遺窺見其中妙義有非口舌所能傳者又見古人作詩命意不苟格律森然立局措辭句斟字酌亦非草草可塞責者是以若不知也者而不言若不能也者而不恒作也然偶出一語偶賦一篇真工部所云語不驚人死不休者其謂是乎豈止與皎然貫休輩相爲伯仲哉上人諱寂然字慎微年始十二卽入空門住錫雲間第一橋下延恩禪院潛心釋典得最上乘晨鐘暮鼓與經聲時達戶外一生鉢貲不私已有大興土木殿宇鼎新克光祖業傳之無窮則其心體之明見地之高非第一等人之作用不及此以第一等之人作第一等之詩又有第一等之賢弟工於八法者爲之樂成其志嗚呼上人雖歿而不歿矣行見四方之賓旅而出於其塗者至第一橋下覓第一等詩且欲見第一等之賢弟從而求書於對清之門者正踵相接也我恐鐵限爲穿殆無虛日已足爲叙



無名空明子七十不受賀序

客問於予曰人生七十古來稀生申介壽理固宜然况先生立言立德無忝達尊令嗣雖在童年聲稱籍籍何為扁舟一葉避迹海濱得毋猶有未足者在耶空明子曰唯唯否否古來之稱上壽者一百二十中壽百歲八十猶云下壽予茲始交七十至下壽猶有十年之遠又奚壽為君以予為不當上壽乎抑別自有說乎况予之生辰有不敢賀者三不應賀者二憶予初生之日先君子遠客他鄉此時海氛未靖南北道梗太孺人躬親紡織以育我兄弟勞苦備嘗誰為周卹延師教子不少寬假迨先君子家食之時予年已十有四矣回思此景尚



敢言賀乎年近成童下帷力學不間寒暑日以繼夜先  
君子博通古今耳提面命朝夕不輟敢憚勤勞時菽之  
外無攻經史忽患咯血幾致不起臥病三載參苓無算  
先君子憐此弱息家又中落病愈婚娶大厦難支回思  
此景尚敢言賀乎幼學壯行儒者之志弱冠遊庠飛鳴  
失望壯年受職仕宦無門直至六旬始得一缺頭白齒  
落拜跪未能徵書交迫勉強從事不及一年移疾歸里  
各憲之挽留都人士之攀轅臥轍自愧筋力已衰未能  
報稱恐虛 朝廷之祿養有負衆人之屬望回思此景  
尚敢言賀乎天地生我初非無意父母望我豈曰徒然  
無奈所爲拂亂時運難逢幼而失意長而無成德不修

而學不講雖與人無爭猶虞不免孝經云立身行道揚  
名於後世以顯父母爲問我躬能乎不能乎以云承先  
承先誠有愧矣其不應賀者一得子差晚教誨敢遲文  
章經濟二者並行無奈年未成童修齊之道尚堪指示  
平治之理難以貫通爲今之計莫若以經傳立其基以  
子史擴其用待志學之年再爲之優游涵養以仁義爲  
飲食以禮樂爲冠裳使之得爲正人君子不致悖於聖  
人之道以云啓後啓後正未有艾也其不應賀者二存  
此三不敢與二不應之心即臻上壽猶當退避而况區  
區僅七十乎雖然予豈終不受賀者哉當 聖君在上  
樂育萬物愛養羣生輕雷以動之和風以拂之露以滋



之雨以潤之利用厚生民無天扎我方遊於光天化日  
之下衣租食稅返樸歸真山靜太古日長小年視彼上  
壽直易易事竚見樂彼遐齡子孫繞膝俾各執一業共  
勸雅化上報 君恩下酬祖德從此進三多之祝誦九  
如之章日日稱觴我心猶以爲未足又何待請而後可  
哉因笑謂客曰當此而不與我介壽者罰酒一斗客曰  
敬聞命矣若先生當此而仍蹈前轍者亦同此罰空明  
子曰諾請書之座隅以爲異日稱觴之券

五松圖解

我友鍾先生以五松圖爲壽卻之者再一日先生攜圖  
而至謂予曰請展圖一覽可乎但見兩峰高峙瀑布下  
注五松挺拔二人貌甚閒暇不衫不履並坐其下意致  
高古非近時人可到之技視之乃名手葉有年之筆寫  
於順治十五年戊戌歲也予曰先生意甚隆渥然予一  
生守不取之戒最嚴故卒不敢受先生曰請長言之可  
乎予曰何不可先生曰天地未剖先有太極先生生於  
順治己亥之上巳而此圖寫於順治戊戌之首春是未  
有先生先有此圖此圖蓋先生之太極也其宜爲先生  
壽者一雙峰插天傑出雲表今先生喬梓濟美不啻若



兩山之並峙焉况乎道德卓絕品行超然尤非後學所  
可及詩云高山仰止景行行止雖不能至私心向往之  
其宜爲先生壽者二水出高源噴珠灑雪汪洋四達煙  
雲萬狀孟子曰原泉混混不舍晝夜有本者如是先生  
之學有原有本發之爲語言達之爲文字俱能滔滔滾  
滾浩浩蕩蕩使人有望洋之嘆其宜爲先生壽者三一  
掌不劈宛若太華中空洞然杳不可測下有一石若虎  
豹之蹲若犀象之伏出沒變化莫能擬議老子所謂虛  
其心實其腹惟先生爲能似之其宜爲先生壽者四並  
坐交爲誰賓誰主將聽鷓鴣而攜雙柑斗酒乎抑賞音而  
奏高山流水乎易曰二人同心其利斷金殆志同道合

始終不渝者乎先生交遊不濫所往還者不過二三君  
子彼兩人得毋類是其宜爲先生壽者五五松蒼翠勁  
節凌風遮星蔽日天籟遙傳逍遙物外不知其年之幾  
萬幾千也再以松之五株與先生之行六叅之五者數  
之竒也六者數之偶也以五並六竒偶相生是之謂陰  
陽竒者數之陽也偶者數之陰也以陰配陽陰陽合宜  
是之謂道合五六而并之共得十一數十者數之極也  
一者數之始也以至十以十開一數之無窮也先生  
其殆八千歲爲春八千歲爲秋者乎摩詰云閉戶著書  
多歲月種松皆作老龍鱗非先生孰克當之其宜爲先  
生壽者六予聞之避席敬謝曰予涼德老大無成自愧



空明子文集卷下  
滋甚然先生之情又不能固卻謹拜嘉藏之笥中貽之  
子孫以重先生之賜

空明子文集卷下

華亭張榮景桓著

容膝齋記

婿戴宣晴江較

齋名容膝志隘也齋何取乎容膝志幸也夫居天下之  
廣居立天下之正位此固大丈夫之所爲也亦我人分  
內事也無奈教化行於上而士風日趨於下奔走權門  
者有之趨趨要路者有之當其利慾熏心之際得失交  
戰於胸中豈但俯其首而鞠其躬膝亦不覺爲之屈矣  
夫膝也者所以載我身者也膝屈而身亦爲之屈矣身  
屈而首亦爲之屈矣首屈而心必爲之屈矣故最易屈  
者惟膝而最難伸者亦惟膝人惟知屈後之不復能伸



也勢必改變肺肝盡喪其生平之所守而後止及其既見君子而赧然見於面若不能自容者亦共非之不復齒於士人之列吁可悲也已間嘗上考古人有抱膝而吟梁父者有捫膝而云不負汝者要不若淵明容膝之易安也取以名齋何快如之齋之前迴廊幾曲拳石數堆竹木交蔭藤花盈砌蒼苔點堦蝴蝶低舞有時白日盪空有時浮雲覆閣有時月影上牆有時和風入牖有時猛雨灑窗有時六花積素此皆天地之文章爲此齋之點綴也欲吟詩則搖我膝焉欲彈琴則橫我膝焉欲接友則促我膝焉欲抱子則置我膝焉人聲寂寂鳥鳴嚶嚶心曠神怡如對古昔聖賢於一室之內然後知此齋之足以媿美乎廣居也我非不欲人之加諸膝也恐未幾推而墜之淵已



狐鬼記

聞吳淞濱海有異物焉名曰狐鬼狐善媚鬼善偷合二者之靈以成形故自名爲狐鬼性陰毒射工水弩時相往來暗噬人影中其毒者無不迷悶欲歿海濱之人亦有能禳之者先畫周易爻象後書六甲令病者正視良久然後舉火焚之病遂立愈不然鮮有能救之者亦能噓氣成霧幻作蜃樓海市眩惑視聽性喜陰穴居於城之西北隅遂與城狐訂盟交好無間北邙咫尺奇鬼出入亦必與偕時或化男子或爲婦人遇人則巧伺顏色善能應對亦能嬌啼宛轉作惘惘可憐之狀見之者不知其爲狐鬼也遇物則盜竊一空攫取無厭變幻不測



莫可端倪人始知其爲狐鬼之伎倆也愛緣木口中時時吐火焰燒空人或一見輒多害瘡間嘗呼朋引類聚麀一窟亦嘗招納城狐奇鬼以淫其所生之小狐鬼用爲歡樂後湯公撫吳狐鬼遠遁踪跡遂絕或曰此何怪也予曰此山海經之所不載予又烏乎知之

野史氏曰狐性淫善媚故吸人之精髓也易鬼無形善瞞又陰毒故鑠人之肌骨也亦不難二者有一於此遇之者我固知其難免已况併二者之靈以成形乎觀其聚麀一窟至自獻其子女亦禽獸鬼怪中之最無行止者也卒不及防動遭其害吁可畏哉

### 馴狗記

狗有自遠方來者形甚矮高不滿八寸長不及尺五向閤人俯首帖耳宛轉戶外若求住之狀拒不納臥階下者三晝夜驅之不去閤人憐焉引之入至堂前不敢進逡巡簷廡間與之食卒不遽食命之食然後食食必潔淨毋穉狀毋貪意夜則司門甚謹日則依依戀主見有不衣冠而至者必逐之去而後已或見之問曰何處得此馴狗來予對曰此狗形而人性者也嗟乎彼狗也而能人其性焉不較勝於人形而狗性者哉

空明子曰予舊聞東關外豪奴方三十者主人命之司閤出入索錢否則與人詈罵不已與狗之攔門見



人必咬者無以異也人比之爲攔門狗後主人託之  
司錢穀事事作弊竊取無算與狗之見食必偷者無  
以異也人比之爲偷食狗後生兩兒肆行不法同輩  
規之護短特甚與狗之護兒者無以異也人比之爲  
護兒狗後主人苑幼主欲責之潛逃出外者半載與  
狗之怕棒者無以異也人比之爲怕棒狗嗟乎方三  
十之一生作爲若此視馴狗不亦羞歟乎

雌雞村記

泊舟村落未夜半而聞雞鳴少頃羣雞亂鳴問童子曰  
此何時也對曰鼓三下矣及明村人至詢之知爲雌雞  
之聲也予曰異哉狗司夜雞司晨理之常也書曰牝雞  
之晨惟家之索今不應鳴而能鳴又鳴非其候毋乃大  
不祥乎村人曰方巨室之畜是牝也未嘗鳴善於生郊  
主人愛之一夕忽鳴鳴又怪甚主人疑焉披衣急起羣  
盜適至盜疑主人之有備也驚駭而散主人益愛之飼  
以精鑿佐以珍味牝以爲主人之嬖已也鳴之不已一  
夜輒無間斷於是羣牝倣之一村化之公雞不敢鳴所  
聞者皆雌雞之聲也我村習以爲常而亦恬不爲怪矣



後村多火災巨室殞於非命而雌雞之聲如故舊傳此地家畜吠狗以防奸宄原名惡狗村今變爲雌雞村矣空明子曰牝雞陰類也牝而鳴是陰奪陽權妻操夫政矣而乃嬖之反以不祥爲祥其死於非命也不亦宜乎又何怪乎尤物之垂戒於賢母長舌之見刺於詩人也哉

空明子曰雌雞本不足記但恐一村如是沿及他村流禍可勝道哉觀夫因鳴而多火災因火災而巨室殞於非命凡有雌雞者可不以巨室爲著蔡乎

### 睡香記

睡香花相傳產於廬山有僧睡巖穴中聞香觸鼻逆風尋之因得是花不知其名強名之曰睡香花之所由來也世俗易睡爲瑞陋矣今春偶見一株本不甚高枝幹扶疎蓓蕾怒發園丁屈曲之圓如盤白如雪見而愛之覓而置之座右時值春初洋茶盛開盆梅正茂爭妍鬪豔覺此花黯然失色及衆芳凋謝而此花猶能竒香勃鬱驅除睡魔醒人夢寐以益人智慧其有功於人豈淺鮮哉我因是而知晚香之真足貴已聊書之以志感

空明子曰睡香小草耳何足記獨念春花爛熳有色無香者居多而此花獨能於空山窮谷之中吐其異



香醒高僧之夢其超然別致爲何如乎以視抹粉塗  
脂紛紛逐臭者相去不萬里哉

臯羽記

虞公者姓臯名羽浙之餘姚人也背生兩肉翅奔走如  
飛日可行四五百里人以此奇之年漸長好爲無賴里  
黨不能容因浪游閩廣川貴間作事愛覺荒繆怪誕利  
口便便目光時時側露頗能飲終夕無醉態乞食旣久  
漸至狼狽歸家家業又蕩盡丐寓藥王廟左貧不能自  
存於是習岐黃之術適父有疾羽曰我道已成施由親  
始請嘗試之纔一劑幾殞其命間有抱病求醫者無論  
識與不識輒操刃以待笑謂所親曰世上寧有好人我  
當代闔羅老子勾消幾百輩亦是大陰隲事後因手滑  
日殺數人每自以爲豪快不悔也一日夢其祖父告之



曰上帝好生汝獨好殺殺手太狠殺心太毒作孽莫道  
罪不勝誅今當得抽腸剝心之報已矣無復救已醒來  
隨嘔痰數升未幾腸胃亦零星腐爛而出宛轉牀簾幾  
及匝月忽有一物從口中躍出突然墮地大如杯色如  
血衆視之知嘔出者乃心也羽遂哀號而絕貧不能斂  
隨付楚人一炬其妻子轉徙靡定亦狼籍殆盡矣  
野史氏曰方虞公之浪遊也似豪俠者之所爲及其  
無所遇而歸志已大沮矣家徒壁立欲借賣藥殺人  
以洩其忿流禍有不可勝言者其始也幾殺其親親  
雖未曾罹其害而羽之罪已上通於天矣剝心而死  
不亦空乎

游僧潘十四記

游僧潘十四者陝之華陰人也字人重幼無賴目不識  
丁娶某氏生一男狼藉特甚不獲已投少林削髮爲僧  
習其拳勇藝雖未精熟而梟雄若有不可一立者遍遊  
長安及秦趙齊魯等處隨身帶一棍棍短不盈三尺規  
其體束其頸其形若槌沿門託鉢食必以酒肉醉飽爲  
度稍不遂意即加詬詈詬詈不已短棍隨之羣目之爲  
鴟鵂然終亦莫之較也生平多口過一日得罪於少年  
少年約同類飽以老拳更灌之以牛馬糞無算嗣後口  
有臭疾卒不可療出語便帶穢氣使人聞風趨避儕輩  
亦深厭惡之無不以爲法門之羅刹也旣而年齒日增



游興日減因結茅於浙水之西寄食於賣菜傭家傭頗  
窘僧憐之將鉢貲數金畀傭不半年傭已用盡僧索逋  
傭未能償僧怒甚努目視傭傭罔知所措無明一發魔  
鬼生風舉棍一擊而傭之腦迸裂矣於是亡命至送老  
邨邨人以其僧也善遇之供養於立武殿側日與里老  
孟璜往還殿左有紫竹觀音菴一座時或過從因自號  
曰心竹其飲酒食肉如故也衆稍遠之獨孟不以爲嫌  
相賞於形骸之外孟酒徒也亦豪民也疑爲仙佛玩立  
以故深相結納僧愈不自檢其狂態不可遏抑偶晨出  
飲於酒家踉蹌而歸匍匐道左卒於江濱孟踪跡三日  
始覓其殘骸於蘆荻叢中而兩手已爲狼鼠嚙去大半  
急急置龕中以茶毘之嗚呼不有孟老其不爲狗啃者  
幾希矣

野史氏曰天道無親常與善人心竹棄家脩道可謂  
放下屠刀者矣而乃不思精進穢語時聞短棍斃傭  
希圖亡命天誘其衷狼鼠斷其兩手此上帝所以昭  
伐惡之義也報應不爽有如是夫若孟璜者違天葬  
之雖曰交道空然然我恐菜傭之終爲爾索命也



哀山頭辭

仰高山之在望兮欽祖德之克遵念先型之不遠兮惟  
古墓之是求爰窮源而溯本兮瞻高曾之同此一邱越  
百步而拜王父母兮看墓門之遙拱乎松楸彼子孫之  
墓祭兮自應佩玉而鳴球孝享宜少長之咸集兮何大  
半之逗遛貧賤者旣云舟車之乏力兮富貴者又怨道  
里之阻修耽閨房之燕昵兮忘大德之莫酬問年而皆  
至半百外兮又何安之必偷遠遊而直至十年餘兮又  
何祖之必仇雖有孫而若無孫兮奚賴此泛泛之蟬蛸  
若有孫而終不祭掃兮祖宗亦多事此貽厥孫謀請爾  
曹清夜自思兮爾又曷望乎克紹箕裘



空明子曰予閱感應篇圖說見孔墳莖母後歷官至  
秘書丞始歸焚黃其母忽現其前責曰汝棄我去歲  
時寄食二女家爲子當如是耶陰司本欲罪汝以警  
於世因汝居官修謹姑且置之自此切須勤視墳塚  
以寧山神亦以安我也凡未有子而欲求子與有子  
而望克昌厥後者可不以此爲鑑戒耶

毀譽無定

番人有攜其妻子自海上來者姓水妻亦水姓生一子  
名曰水郎水郎蚤天番人避迹城市築室海濱疊石爲  
山緣山種竹間植桃梅松檜鬱然成林曲廊窈窕頗極  
幽致漸通華人言語亦能出俚句悅人有聞之者輒非  
笑之予曰不可彼番人也生長絕域若異類然能如是  
是亦足矣奚以笑爲番人聞而喜喜而狂狂而日甚一  
日不自知其不可也有時着宮錦袍捉月江上有時把  
菊籬邊望白衣人送酒至悠悠之口道路流傳轉相羨  
曰彼番也而能詩若是於是羣趨其門罔談彼短卽一  
二有識之士亦奔走之不暇嗚呼何前踞後恭一至此



哉未幾水姓妻去去番人亦從而謝賓客矣門庭冷落  
竹木蕭條燕語空梁庭喧鳥雀誰復有過而問焉者毀  
之者仍復如前予曉之曰無庸毀姑留之以當一夕話  
且俟好事者採入古笑史中又何不可之有

野史氏曰予至海上遇番人於儻人廣衆之中見其  
言甚鄙心甚狡有籠絡一壺之意卽爲別去因道里  
脩阻音問莫通後聞其能詩有客告予曰番詩不遵  
古式不趨時尚自成一體士多毀之未幾有譽之者  
又不啻若自其口出番人告殂後譽之者亦轉而毀  
之矣嗚呼毀譽果無定乎哉何若是之速也聊書數  
行以斷浮議

### 猴報

嶺南多巉巖峭壁人踪罕到羣猴聚焉攀枝摘葉懸崖  
跳澗相聚爲樂不下千百萬計大凡猴性愛動而不喜  
靜愛淫而不喜孤寂中有老猴其淫尤異好與狼交狼  
產子猴形而狼性者也狼母抱歸老猴老猴以爲肖已  
愛之愈於羣猴羣猴以爲異類所出共欲逐之老猴不  
得已攜之歷東海經燕山及玉關雁門諸處而猴意殊  
怏怏也旋棄老猴而遁於江浙之間未及半載忽悵然  
思歸旣歸益無聊賴四顧寂寥爰求牝猴爲室已而連  
產數子自相配偶子復生子實繁有徒穴居一窟夜郎  
自大百里之內名花異卉蹂躪殆盡芳園佳果竊食一



光無僅存者行旅往來莫不遭其狎侮毀裂衣冠遠近  
苦之一日忽有客自遠方來者牽韓盧而過猴不知其  
爲獵人也意欲侮弄之不料犬突出噬猴猴卒不及防  
竟斃於犬於是羣猴驚駭奔散一方以寧衆共快之  
野史氏曰方老猴之攜小猴而前往也初不計小猴  
之負我也及其背之而潛遁也然後知小猴固狼之  
所產也夫狼固中山之裔也則猴亦中山之種也宜  
乎其棄老猴而潛遁也天道斃之以犬又何其不爽  
也然猴屬金犬屬土犬也者猴之母也非惟不能生  
之反從而殺之此其故何也求其解而卒不可得得  
毋以上重埋金之故耶

### 老蚌說

春申爲雲間之巨川西受宣歙諸水北納震澤泖澱衆  
流匯而朝宗於海綿亘百有餘里波濤洶湧深莫可測  
郡城以南時見煙雲出沒千變萬狀或風恬浪靜月朗  
星稀燄冲霄漢氣射牛斗問之土人皆曰此下有一老  
蚌胎含夜光東至閘港西至金灣圓折生焉尅芒自不  
可遏抑神龍幾度欲攫之而未能也嘗聞故老云龍之  
欲攫是珠也雷霆導其前風雲護其後龍攻之者再蚌  
亦不憚峻拒甚至計窮力竭鮮血橫流且吸不潔之物  
以噴之勢如泉湧龍性愛潔恐其汚已也遠引而去而  
珠卒不可得嗟乎嗟乎蚌之爲蚌何其徒知愛珠而不



知愛身一至於此夫蚌既但知愛珠而不知愛身矣龍其奈此老蚌乎哉

野史氏曰蚌屬水陰物也亦柔物也龍屬火陽物也亦剛物也水能制火陰能制陽柔能制剛由來舊矣猶之君子之欲去小人也甚難而小人之欲害君子也易於反掌龍其潛淵弗用毋與老蚌爭珠可也

討逆孽吳姓檄文

逆孽吳姓者寄居松郡原籍天都冒姓寒宗聯姻望族痛汝十齡喪父幾成涸轍之魚念我廿載撫孤鍊就補天之石豈料榮命不辰無奈獸心特異延師訓誨視詩云子曰如同殺父之仇納婢猖狂結狗黨狐群欲作通家之好重利剝民老拳毆母兩弟分爨禍有千遭一照護符目無三尺監生房畔居然奶奶尊稱阿引樓前亦有娘娘別號包納漕糧人號扒倉老鼠暗唆詞訟羣推拆屋斧頭隔隣倚桌竊如日攘之雞同室雌雄蕩似風飄之絮淫宣四七喪母小祥之內產得豺狼禮瀆三千大塊之中行同狗彘小僕曹奴稱爹爹而日常侍坐老陰



馬氏呼姆姆而夜必聯床堂前對簿兩手成冰階下親  
供滿頭流汗地丁明欠累官長之考成典舖私開漏朝  
廷之稅課種種不法縷縷難陳榮承託孤之任今遭反  
噬之寃然射工水弩豈容於化日光天但木魅山妖難  
免於雷轟斧擊雖我生我殺義在不爲而事始事終世  
宜共諒

答討匿名檄文

崇川夫子乃蘇州九學之公稱空明先生實松郡同人  
之私號豈爲逾分詎曰不宐忽有狂夫妄張謗帖依草  
附木裝成如鬼如魅之形匿影潛踪做出若隱若現之  
狀光天之下產此窮竒化日之中美彼伎倆榮閉門自  
好恒多縞紵之歡執德不回或有僉壬之毀懷司馬之  
隱憂不足爲異搜東陵之盛怒適得其常茲值壬寅回  
思戍戍奉 天子之恩旨捧大部之明文沐中丞之隆  
情叨各憲之雅愛進學使者以危詞直言無隱作上將  
軍之揖客把臂交歡冰玉持躬雪霜凜操忝居一日之  
師謬得三吳之譽老邁不堪仕未暮年而解組才華少



有集成半世而災梨因病辭官方喜庭前寂寂得閒教  
子忽聞戶外狺狺黑白不分是非倒置然浮雲過盡必  
見青天烈焰燒殘何傷白璧著書閉戶又邀大尹之褒  
道學文章旋獲賢侯之獎誰爲造孽作此匿名可知物  
以類聚薰蕕原不同升品以羣分邪正必歸兩路言何  
益哉悔無及矣中山逢反噬之狼自貽伊戚巨壑值吞  
舟之鱗莫可誰何然詞多詭僻終遭兩觀之誅律有明  
條難免三危之竄

答討匿名某氏檄文

匿名某氏者一腔草料人共鄙之滿肚糞渣品斯下  
矣於我無一面之交在彼婪三星之利初聞之於高  
陽繼述之於京兆近因茭溪先生向我友而竊議石  
坡社長對舍弟而陳詞直論其非咸稱其妄今不必  
實指其人以明之然亦何妨作含糊語以答之古人  
云無言不酬無德不報此之謂也爰撰數言以博一  
粲免書大名用存厚道

匿名某氏者似鬼似蜮如蝎如蛇交牙嚙戶在傳駙狗  
之家利嘴啄親人識逆梟之種指乃尊是三黨中之鄙  
夫以厥祖爲五倫外之棄物豎卜戕人有命者每多潛



遁貪婪成性無良輩恒與同羣若乃遯其世德在勝國  
未是純臣至于論厥家聲卽伊門爭云敗類筆底欠通  
逢歲試顛之倒之必在諸公之上舌尖稍利考庸行省  
焉察焉定爲巨逆之魁全虧而翁盛饌尚延娘面一脉  
之親不有阿母偏憐焉得舅族兩家之姓毒藥殺妻老  
拳飽祖逐季父以竄海逼猶子以懸梁無棺可斂弟歿  
之謂何看屍骸之零落有肉不供親食之難下致涕淚  
之縱橫燒丹騙人貨物反誇術並神仙娶婦責彼裝奩  
幾致訟興雀鼠半盞燒刀一盤鮮韭繾綣之宵聊笑羊  
羔美酒勝如黨尉風流兩篇狗屁百錠臭銅黃緣之日  
權充花帽錦衣賽過王維鑽刺占僕妻以凌祖母少酬  
衽席之歡賴會帳而辱尊親大發雷霆之怒羣嗤摸壁  
鬼之佳名共慶壓蛇龜之雅號可憐梁孟時乖何日託  
主人之廡下無奈蕙蘭年邁幾時覓孤老於樓頭若謂  
捐納可議於我不以爲奇但愁乃祖陰魂未免含羞地  
下如云牀第多愆在爾自道其實只恐令妻嬌面不無  
抱愧房中敗倫傷化哄來通寶花銀鬼語妖言溺出牛  
溲馬勃雖叅謀有主然不因瘦狗何自噬人卽指使多  
克但未獲神爨誰能撲趙



先塋考畧

附妻妾七兒  
七女新阡

嘗觀世之作家乘者無不遠宗前哲近援時貴合成一  
譜誇耀於人雖足以眩惑視聽然不免謂他人父心竊  
鄙之予生也晚祀宋無徵姑述高曾祖考四世猶覺實  
而有擬其嘉言嫩行大約得之於故老之傳述及已之  
所目擊者居多因畧書數語并志墓地俾後世子孫知  
水源木本積厚流光之有自來也榮謹識

高祖考妣

高祖心塘府君諱方世居上海縣之浦東幼業儒不樂  
仕進及長因就婚陳門始遷於天章橋左開門受徒從  
游者衆後再遷於三林鎮之南街擴大其業與陳太孺



人和鳴一室鄉里比之梁孟生三子長華春公仲可交  
公卽榮之曾王父也季振宇公墓在上海縣二十一保  
三林鎮南里許

贊曰芋涇之東鬱鬱葱葱鶯吟於柳鶴巢於松維我  
高祖克開厥後敬業樂羣德音是茂一杯高聳山靈  
毓秀保我子孫永奉籩豆

曾祖考妣

曾祖可交府君諱耀邦性好游俠輕貨殖重然諾不屑  
事家人生產娶儲太夫人係正德丁丑詞林芋西公嫡  
姪女太夫人生長名門心甘淡泊養親教子勞苦備嘗  
使府君無內顧之憂北極遼海南極閩粵郵亭客舍多

所題咏皆太夫人力也今府君以曾孫集貴誥贈光祿  
大夫兵部左侍郎太夫人贈一品夫人生二子長卽榮  
之王父從周公也次伯玉公祔墓於高祖考墓右

贊曰兩世濟美合德流芳徽音克嗣源遠流長 龍  
章寵錫泉壤重光聿彼柏林載沾時雨欣欣向榮長  
存千古瞻仰昊天繩其祖武

先祖考妣

王父從周府君諱尙文性至孝童而穎異年始成人卽  
能拒奔女代叔父償宿逋四百餘金撫弟以恩樂善好  
施終身不倦三黨之親及遠近鄉里沐其惠者莫可枚  
舉娶祖母趙太夫人相敬如賓一生不二色持身尤嚴



衾影喜慍不形於色軼事載郡邑省志中以孫集貴贈  
吏部左侍郎太夫人贈一品夫人生三子長伯父筠齋  
公仲卽榮之先人東臯府君季叔父有芑公長孫集丙  
辰進士由行人歷陞少宰歿後 賜一品祭塋次菜韭  
祭案俱由例監生考授州佐次榮由歲貢授蘇州府崇  
明縣儒學於康熙五十八年五月到任卽於五十九年  
三月告病歸里次菜歲貢生候選訓導次彙歲貢生由  
刑部陞任郎中 誥封翰林院次維煦壬午舉人辭翰  
林院 誥命次梁癸巳進士候補中書科曾孫棠丙子  
舉人由戶部員外郎歷陞桂林知府以副使道告終養  
回籍次煜癸巳舉人候選知縣次照巳丑進士由翰林

院庶常歷陞侍講學士次夢徵戊戌進士由翰林院庶  
常陞授編脩其餘貢監庠生不能備錄墓在上海縣二  
十一保三林鎮南與高祖墓相去咫尺

贊曰明明我祖德備倫常以似以續五世其昌載瞻  
堂構令問弗忘三株比瑞七葉呈祥綿綿孫子躋躋  
躋躋爲善最樂何用不臧

先考妣

先考東臯府君諱復一生博涉羣書隱而不仕雅好交  
游推解弗倦以故長安名卿鉅公無不欲望見顏色娶  
先母吳太孺人尤能曲體府君之意四方賓客至者美  
醞佳肴咄嗟立辦府君性喜遊覽瞻禮雲臺於海外訪



林屋洞天於震澤謁先聖於曲阜拜二女於蒼梧會秘  
禹穴嚴灘釣臺探奇索隱履險如夷足跡所至吟咏隨  
之著有毘陵紀遊名山雜記隨意吟共數十卷生四子  
長荼仲棐叔榮季棻今墓在華亭縣三十六保泗涇之  
南盤龍之西官涇橋之右

贊曰先君子志趣閒曠氣宇軒昂喜吟蜀道之李愛  
誦秋水之莊所以視富貴如浮雲尋赤松而翱翔也  
先慈躬親紡織朝夕不遑時時以逸勞教子真堪媿  
美乎敬姜宐平生城之鬱鬱追來孝於烝嘗

先室

生於順治十五年戊戌十月二十五日辰時  
歿於康熙五十六年丁酉九月十二日申時

先室吳孺人族本新安寄籍雲間者已四世幼嫻母訓

廿二于歸克孝克順克勤克儉聿脩內則終身一轍所  
生一子三女俱夭後庶生一女適辛未鼎元瓏巖戴公  
次子宣又庶生一子兆熊孺人俱愛逾已出顧復彌殷  
兆熊交四歲而孺人歿墓在上海縣二十一保三林鎮  
南德福橋之北

贊曰方孺人之歸予也予善病奉事湯藥朝夕靡倦  
病少痊相勉以善相畜以德及病愈勸予讀書每至  
漏盡親率小婢紡績不懈又見予性剛出必罹禍莫  
求仕進以保餘生後因喪子爲予置側室迨舉雄而  
孺人之願始遂今日蓋棺論定墓木盈握可謂賢矣  
詩云無非無儀惟酒食是議無父母詒罹孺人有焉



亡妾

生於康熙三十一年壬申六月廿八日寅時  
歿於六十一年壬寅七月二十一日酉時

妾萬氏吳郡人十八于歸小心勤慎無忝婦道吳孺人  
亡後操家井井有法生子兆熊愛若掌珠然能不事姑  
息課誦弗少寬假御下頗爲得體壬寅七月亡祔葬於  
先室吳孺人之右

贊曰五十喪子憂心忡忡駕言出遊茂苑之東爰求  
淑女春日和融扶風有子莊敬家風婦儀無忝德茂  
言工旣而生子爰名兆熊訓子有方益凜厥躬和以  
接物和而不同寬以御下寬而得中豈期不祿夕陽  
隕紅祔於正嫡遺澤無窮

亡女

生於康熙十九年庚申八月初九日巳時  
歿於三十七年戊寅八月初九日巳時

長女係吳孺人出自幼柔弱而聰明過人六七歲時開  
卷亦能朗誦過目終身不忘女工之暇兼喜吟詩句每  
見予嘔血輒私自飲泣恐予知之而心傷也孺弟年幼  
恩愛備至初患目疾旋成癆瘵鑿藥罔效竟致不起墓  
在青浦縣三十三保淞塘之右

贊曰嗟嗟我女手斂心靈孝敬父母友愛鵲鴿柔嘉  
令範玉立亭亭豈料染疾久困參苓服藥弗效卒歲  
靡寧嗚呼痛哉薤爾新塋

亡男

生於康熙三十一年壬申十月初九日寅時  
歿於四十六年丁亥九月二十一日卯時

亡男堽字允諧妾徐氏出四五歲時見四子書如逢舊  
識六歲時能自出已意講解出人意表戊午孝廉瞻岷



董先生諱德其及徵君樸村大兄諱雲章見之俱目之  
爲神童遠近驚駭嘖嘖稱嘆自幼至成童五經左國史  
漢唐宋大家程朱諸書言下俱能了了專心聖學頗有  
任道之意不料十六歲九月中一病不起亡後爲刊其  
遺稿數篇附於空明子四書文之後墓在青浦縣三十  
三保淞塘之右與長女墳相去僅隔數武

贊曰歲值壬申生兒奇特不學而能聰明正直此殆  
天授而非人力刻意學文不遑日昃孝弟性成威儀  
不忒仔肩聖道擴充知識方期上達有志弗克短命  
而歿天道莫測墓爾高原以彰懿德

空明子偶吟雜藁

華亭張榮景桓著

男兆熊延年

集氏較

題松陰避暑圖

森森千丈立高峰記得秦時舊有封赤日漏光炎似火  
綠雲弄影勢如龍何須輔國迎涼草直壓玄裝摩頂松  
聞道鶴棲君子樹野人正合托行踪

山居

新竹環門綠牆高只及肩望空千里遠臥對一山偏得  
酒思婪尾烹茶憶火前客來常滿座多半是游仙

雪晴曲

一月二日雪乍晴忽見瓊樓玉宇一夜天琢成銀泥木



屑鋪滿地鷺毛片片耀日明直疑玉龍卸甲三千里又  
疑鮫人織綃噴水晶不數吳門挂白練恰似麪市集荒  
城年來畏寒眠未穩三冬過去常自忖春分時候四陽  
生種得芝蘭成九畹豈期連宵風雪嚴柳尙未花絮先  
滾冷飈鑽窗刺人面令我病軀多偃蹇何時薰風入我  
懷綠陰漏出青山遠

新燕

穿簾紫燕戀芳辰不惜啣泥來去頻幾度雕梁勤相度  
經營故壘一番新

暮春

綠陰如幔草如茵一枕松風老此身臥病多年憐短髮  
廢書千卷惜殘春故交落落晨星暗細柳翩翩夜月新  
且聽日長鶯百轉繁花滿眼得相親

小窗

濛濛細雨濕輕塵手捲珠簾萬象新蘭蕙滿庭雙燕入  
日長無事度青春

白雪吟

睡花香酷烈古梅索笑幹似鐵更有名茶來粵嶠逞  
奇鬪豔堪三絕依稀天上散瓊瑤彷彿清言霏玉屑簾  
前鳥語低復高叫斷花魂聲欲咽國香忽從門外來穿  
窗度檻幾曲折一枝贈君君莫訝不與羣英較芳潔能  
令香氣入心脾助君陽春歌白雪



寒食展墓

墓門松柏鬱成林黃鳥綿蠻送好音筋力衰頽年入暮  
斷腸何處寄愁心

夢見友人家奚童勤甚戲作此詩錄出一笑

整頓交牀細細揩芟除蔓草淨閒堦擔柴從未甘偷嬾  
舂米何曾會使垂小飲豈同無底甕上堂不着沒跟鞋  
消停且待東君貴馬後車前一暢懷

東風行

東風飛香滿城綠別院無人似空谷隔牆斜壓一枝梅  
低傍寒窗伴幽獨推窗四望雲靄隸老樹縱橫撐山腹  
春禽學語未成聲時雜孤墳野鬼哭荒荒古廟枕危橋

靈旗捲空弄霖霖

送春

去歲青遠花正妍今春依舊點江邊可憐四月清和景  
催送韶光又一年

有感

杜門不與世周旋人事蹉跎又十年雙燕呢喃尋舊壘  
一春風雨漲前川夜來苦魘愁難醒午後聞雞倦欲眠  
虛度古稀悲老大着鞭蚤讓祖生先

題鷗亭汪先生行樂圖

薰風南來若醍醐有客寄到東山競秀行樂圖披圖忽  
見鷗亭先生坐片石令我肅然起敬遙想世澤之在天



都天生異人原不苟六州保障功豈偶崔嵬廟貌神赫  
赫代產名賢富二酉奕葉相仍列祭戟連枝暢見荆花  
茂先生愛日獨辭榮不願黃金印如斗閉門養志數十  
年濂洛關閩探索久芝蘭玉樹競爭芳膝下傳經澤流  
後齊眉舉案世所羨五世一堂尤僅有先生模範學者  
師龍馬精神松栢姿元亭問字戶常滿鑄顏亟亟如調  
饑愧我生兒非雛鳳絲蘿得附喬木枝自憐雌伏甘放  
棄世情冷煖誰復知夙仰斗山勤寤寐溯洄心切恒差  
池正擬登堂祝眉壽凌晨衝寒蒙先施摳衣急訪楊子  
宅珠玉龍蛇滿四壁德音和靄等春雲玉屑霏霏散瑤  
席得覩景星恨見晚把手談心傾夙昔江左咸欽道義  
人雞壇共許文章伯今對此圖如覲面孤標宛似松千  
尺海棠蘭玉映翠微五色瑤芝呈地脉幕天席地氣浩  
然四座無人常脫憤日長小年真太古鸞停定是星辰  
謫但憑人號地行仙千秋看遍遙山碧



空明子雜錄目錄

異種

知己

克己之難

官長解紛

太守廉明

物各有時

酒贊

劉公恩德

士品

友宜交敬

藉勢凌人

鳥獸不可與同羣

游客變態

朱君神術

郡侯賢能

郭述堂恬退

耻字不可不識

梅塢風流

小梁山

一脉之親



生兒不認

湯水圓團

故交足惜

作者七人

索逋良策

敲文嚼字

孟門高弟

西潭老叟

顧君善謔

腹中饑鳴

梅花主人

丐莖名娼

一日三潮

人瑞

數有一定

教子

顯親揚名

弄璋稱慶

官民兩利

大家子弟

賢令罷官

不合時宜

謄文不閱

請看好樣

賓主宜交警

提憲忠誠

門冬異名

譚君風雅

士人貴謙

卻病良方

富貴何常

文無定價

無縫天衣

上巳觀漁

農家孝友

天道難欺

華學名師

罷侯盡職

感舊 計十九條



空明子雜錄

異種

海棠有色無香聞蜀中猶有香者洋茶五彩奪目而香則未聞因念美中不足大抵如此不意去年春間得一本枝葉稀疎心頗忽之及開時千層玉瓣瓣瓣帶一紅點宛然牡丹之一捻紅也清香幽細殊出意表見者莫不詫為異種於是移置堂上愛逾衆卉然後知物理皆然彼操知人之鑑者慎弗皮相天下士也

知已

江右相國朱可亭先生撫浙日清聲峻望一時無兩老友柯亭朱先生覓予空明子初續兩集轉送極蒙激賞



託柯亭先生深致愛慕欲見之意予愧上交不敢修謁  
雖未謀面實一知己也

### 克己之難

古人云人有德於我不可忘也我有德於人不可不忘  
也學道四十餘年纔到得強制地位未能臻於自然甚  
矣克己之難也

### 官長解紛

予素寡交門鮮雜客雖在至親亦不恒覲面一生不合  
時宜幸不見擯於諸賢然往往爲流俗所嫉乙巳歲奉  
禁奸商不得販米出洋與良民實無與也在良民兢兢  
守法猶懼懼禍孰敢抗令兩年來歲屢告凶田租所入

除糧米地丁漕項完官外所餘無幾供一歲之需猶爲  
不給豈能陳陳相因千倉萬箱哉乃有一等游手好事  
之人心懷叵測勾合畝蠹將各家田畝細開具呈官長  
押令照田買米平糶於中射利但時當夏秋之交中人  
之家豈有宿春典衣揭債度日維艱卽一二縉紳大戶  
在三四月間輸將孔迫衆口待哺大約亦不過十存一  
二而已以致人心皇皇臥不安席稍不遂意卽以潛通  
海寇爲辭亂張謗帖劈空駕陷合郡被誣予亦不免幸  
在位君子明見萬里洞燭下情枷責數人此風稍熄不  
然者鼠輩得逞奸謀良民恐無噍類矣

### 太守廉明



三韓嵩山周公壬寅秋蒞任雲間政聲頗著拙陋如予  
不惜折節下交無有閉戶著書品高行潔之獎小兒兆  
熊初交八齡亦蒙拂拭甲辰冬陞任蘇松分巡道未及  
聞命先數日而卒惜哉

物各有時

牡丹花之富貴者也當其花開之日寶闌繡幄蝶舞鶯  
歌何等熱鬧及過夏秋僅存枯梗有何趣味反不若閒  
花野艸之輕盈可愛物各有時毋得以此而笑彼也

酒贊

無濁寧清無薄寧厚混俗和光號曰紅友世人見之而  
喜者大約十居八九然而日近日親未免膽大如斗威  
儀不修雌黃任口朋友畏而潛踪兄弟望而卻走宜乎  
正人斥之曰狂藥大禹痛惡乎旨酒

劉公恩德

安福自陶劉公治婁八載以來寬嚴得中士民樂業百  
姓愛之如慈父母予因暮年得子兆熊凡父黨妻黨中  
之敗類矚予年老子幼謀害百端幸遇神君周全保護  
使我父子得以安枕而臥者皆劉公之賜也今幸予尙  
強健兆熊亦十齡外矣劉公恩德何敢忘之

士品

我松東南環海西北沔澱一澤國也生是邦者多秀民  
焉然水性潤下所以士品易於卑污不克自振者居多



然士君子立身務求上達弗爲方隅所囿也斯可矣

### 友宜交敬

有客造門求見來自水東閩人通焉予念其遠來禮貌逾分翼日又至不料其妄刊一冊非謗先儒勸其速毀益肆狂言因叱之出甚矣此種人之不堪禮貌也大凡朋友一途貴乎慎擇交友之道貴乎相敬我有不敬速改可也友或不敬便當淡淡相與弗爲其所狎侮而後悔予一生不敢輕三尺童子亦不肯見屈於巍巍之大人以從未嘗以無禮先施於人也若使見不知禮之人而必欲申其敬焉譬如向橫目四足者而打躬作揖反惹其狂鳴亂吠暴跳一場不亦大可笑哉

### 藉勢凌人

海南宦家有一外戚生相絕類猢猻坐立不定性復奸險藉勢荼毒鄉里宦家呼而責之俯首帖耳不敢辨一語及出門而搖擺如故也受其害者莫能枚舉有客述之於座間予作俚語以解之云山魃木魅堪爲匹怪犬妖狐可作雙牛鼻穿繩常忍氣猴頭戴面好裝腔草深廢塚迷行路月黑空庭破紙窗遠避莫爲奇鬼弄黎邱伎倆實難降後聞其人造孽多端爲冤鬼索命而歿

### 鳥獸不可與同羣

鶯語有音而無辭燕語又細碎難聽猪狗之聲更覺俗不可耐然後知鳥獸之果不可與同羣也



游客變態

靜坐一室忽有排闥直入者衣不蔽膝狀貌粗疎未通片語跪下叩頭無算予意中不過道其爲流丐也隨呈崇川楊蘭玉一札開函知其人能書善飲因令之坐問曰客何好曰好酒飲幾何曰終日常醉不知其幾何也客何能曰能抄書所抄何書曰亦不過是三字四字經及龍頭雜字而已予曰藏書儘有不敢重煩大筆予一生涓滴不飲少年時亦曾愛酒徒浮大白今則厭苦之矣其人曰僕本婁東唐氏浪游崇川聞先生好客故不遠百里而來幸先生有以處我予曰客誤矣予所好者理學大儒葱湯麥飯便能致敬不似世俗之大碗酒大

塊肉之結歡朋友也因餽之五星令其歸家別尋生理不料其纔出門卽將銀換錢遇酒店輒飲不及兩日錢已告匱又欲求見闈人拒而不納傻口出怨望之語至夜靜潛身門首心懷叵測被夜巡擒獲予知之又給路費數星不令到官放之逸去嗟乎以素未謀面之人又從海外而至贈之五星勸其回籍不爲薄矣乃潛謀毒害幾爲所中始作游客繼變游棍人心之險有如是夫

朱君神術

朱君履坤長洲人工於拆字客游四方雅善病獨坐一室客至有問精言鑿鑿談理奇中走筆如風遂成絕妙好詞亦術士中之矯矯不羣者也予偶過九蓮菴訪之



承賦賀新涼一闋見贈頗有別解一生景况描寫如畫  
詞亦清新可喜爰步原韻作五章答朱君不知朱君以  
爲可否也今錄於此其一云占測堪同璞卜終身承先  
啓後精言鑿鑿早賦歸來全性命不分東漂西泊又何  
待馬頭生角身字無帮應獨立被先生數語都猜著非  
非想豈糟粕 探微索隱先知覺遍人間談星說相鋒  
銛銷卻息鼓鳴金忙退舍步騎一時躁若更打破紛紜  
六幕假館潛名窺造化養微疴搗盡嫦娥藥真絕藝成  
孤學其二云美玉全諸璞任玉人幾番相度未容椎鑿  
不作明堂清廟器甘向深山澹泊豈肯露些些圭角反  
璞歸真安我素又何妨韞櫝空藏著人皆醉糟和粕

我懷未剖君先覺脫朝簪田園樂志塵緣謝卻箬笠蓑  
衣撐小艇採遍芳洲杜若那數他烏棲燕 坤轉乾旋  
天地泰羨神仙無病原無藥我老矣未能學其三云和  
氏徒懷璞嘆當時渾淪一物未經雕鑿世上誰爲識寶  
者曷不深淵投泊勝混迹天涯海角何苦長號淚繼血  
笑精誠一點空沉著似癡漢醉糟粕 就中美玉誰能  
覺况前朝山川柴望許多拋卻寧莫我知羞自獻輸與  
蘅蘭芷若又奚羨登堂入幕便作尊彝禮上帝注黃流  
麴蘖皆狂藥未來事從君學其四云我自完吾璞又豈  
能持其方枘納乎圓鑿俯視塵寰堪一噉身似虛舟難  
泊肯戀此蠅頭蝸角仕未暮年忙解組恐海風飄去魂



無著勲和業酒之粕 曾叅有悟纔無覺古之人耽於  
林壑玄纁三卻道德南華同一意踪跡依然相若任舉  
袂紛紛成幕回首叨陪香案吏守黃庭自有真丹藥超  
三界誰能學其五云誰辦無瑕璞不過是寓形宇內屍  
行六鑿鵬翮垂天九萬里欲向何方棲泊一任他扶搖  
羊角從古浮雲同富貴奈時賢沉醉都酣著真味去徒  
存粕 因聞而悟名緣覺有何人超然物外俗情拋卻  
雅慕勲名書竹帛印綬纍纍若若望塵拜願叅賓幕及  
至到頭原是夢嘆膏粱不是長生藥退一步守吾學

郡侯賢能

山陰念吾周公庚子辛丑兩年共事崇川最稱莫逆予

告致歸里後壬寅歲陞任華亭邑侯是年予正有非意  
相干張冠李戴之事公見之不平承給示有品行端方  
閉門課子文章道學允爲士民之望之語極蒙培植感  
德靡涯居官日徵糧有法愛養百姓仁風洋溢聲名遠  
播偶因公解任 聖主洞鑑賢能隨即復還原任不三  
月 特陞雲間郡侯萬民懼怖誠松郡之大幸也

郭述堂恬退

江都郭述堂負斗山重望以名進士掌教來松素性恬  
淡寂寞品又高絕一世屢空不顧也衡文較藝手不停  
披與予爲道義之交兩心印合熊兕執經門下最蒙珍  
惜今春意欲追踪靖節同人百計留之卒不可得其高



風要非流俗所可幾者臨去時予送之江干贈詩兩章  
情意悽愴灑淚而別

耻字不可不識

予憶三十歲以前侍於父兄長者之側未嘗敢輕措一  
語終日默默而已四十時默默如故也直至五十有七  
始敢以一生著述質之當世猶恐以一言之誤爲終身  
之羞每見近時少年目無尊長放蕩禮法任口雌黃都  
不中節總之未曾識得一箇耻字便覺自己學問有餘  
以致猖狂若此嗟乎嗟乎人而無耻詩刺之矣

梅塢風流

石埭縣梅塢地方士人生二女年近四旬尙未適人然

醜聲遠播里黨鄙之或有爲二女執柯者詢其不字之  
由士人曰二女賦性飄逸雅慕風流在父母家卽有差  
錯猶可通融若嫁丈夫一經發覺如何了得幸謝冰人  
爲我放生二女使之快活一生慎弗作此敗興事

小梁山

上海縣治之西地名小梁山者向爲盜藪三邑交界之  
處官長莫能禁也居其地者雖身列衣冠稍不自檢未  
免爲此風漸染吁習俗之移人也有如此

一脉之親

里人有張華筵而款其子者其子不卽至父邀之再三  
而始來其子曰我從未曾相屈一飯何當享此盛饌里



人曰身亦極窘非好爲此不急之務也然清夜思之我若不作此舉汝娘面上一脉之親竟成陌路矣

### 生兒不認

無賴子生一兒當洗三之日親戚滿堂忽大言向妻母曰此非我所生不當洗妻曰非汝而誰當洗於是兩相爭執驚動隣里妻母忽向女婿曰汝亦不必發怒何苦不認又向女兒曰汝亦不必氣惱何苦必要他認衆問其故妻母曰依女兒說來全然可信依女婿說來尙有可疑各執已見非口舌所能爭也但老婦係此兒外婆此兒是老婦外孫此種瓜葛豈復尙有可疑之處不若老婦爲兒洗之可乎於是羣然曰可遂洗之

### 湯水圓團

鑿士有諱名湯水圓團者因憶李易安詩云輕圓絕勝雞頭肉滑膩偏宜蟹眼湯頗爲工妙聞此人素有龍陽之癖引年少入室後驅之不去醜聲四播予因將後二句改竄成句云一段風流驅不散洞房深處鎖龍陽

### 故交足惜

曹熙如編修天分過人又能好學不倦猶憶庚子春熙如在華亭學俞楠亭署中見空明子集卽蒙枉顧予自揣粗疎未敢接見熙如不憚先施到門者再予因修誠晉謁相見歡然如逢舊識笑談竟日樂以忘歸未幾予至崇川隨告致歸里熙如亦服闋還朝一隔七載音問



杳然去秋熙如復因丁外艱回籍承寄見懷古風一章以志相愛之意今錄於此云空明子今何似憶昔訪我東城隅投我夜光積玉慚報李開緘武庫森矛戟目眩珊瑚生海底驚才兩日賦茸城嘔肝瀝血瀕於歿詼諧寄託中山狼雜說寓言戲劇耳只今掉白頭狂吟時覆被或登峻嶺撫孤松或掉扁舟擷芳芷曷不傾困倒廩付征鴻一披七發沉疴起噫吁嘻眼底誰爲大作家等身著述惟君矣望霜天懷彼美伊何人空明子予感其意亦作七律一首答之并將後集餘集寄去忽於今年暮春突聞其已作故人臨終未能正寢兼多怪異之狀然傳聞異辭不敢全信爲嘆息者久之

作者七人

我家同堂兄弟十有一人十一房之原配六十年來不論老少俱已物故無一存者即予兄弟十一人今亦止存其四作者已七人矣

索逋良策

商山子內外俱好家業蕩盡漸至饑寒或謂之對曰不妨虧得妻妾未老子女衆多失之東隅守之桑榆未爲晚也以此索逋怕不多收他幾倍聞者笑之

齧文嚼字

夏至前後狂霖不已適有鄉親冒雨而至此人最喜齧文嚼字信口噴出能令聞者捧腹坐定寒暄畢予問近



來鄉間景况若何答曰三日大雨全無間斷菜麥受傷殊覺可厭予曰爲之奈何此人答曰雨我無間然矣甚哉雨之不仁也

### 孟門高弟

一士子慣考五等六等其妻聞而怪焉問於士子士子曰周時天子諸侯常居五等諸侯卿士常居六等無足異也我雖未敢自誇爲聖門之徒然在大賢門下定是一位高弟孟子不云乎樂正子二之中四之下也四之下不是五等乎四加了二不是六等乎樂正子不是高弟乎汝何怪焉其妻曰多虧說明不然險些疑惑一莊我看你凡事高高興興料去也不到這樣不通地位

### 西潭老叟

客有自西潭來者云其地有一老叟幼時能文章性好飲善博身爲彌子瑕之行而不自以爲耻至老不悛也鄉里賤之各賦詩以擯於士林之外予聞之亦作一章勸之云聞君慣喜泣前魚耽飲擗蒲不改初到老未能循禮義在前何苦讀詩書十年燈火殊堪惜百歲光陰有幾餘我欲勸君心似石勸君莫學轉輪車

### 顧君善謔

東郭顧君老而善謔一日殘月猶明朝曦未上有客叩門而至顧君曰何其蚤也得毋從西方來耶客曰然也又問有人相從否客曰無之良久客悟曰君以我爲齊



人耶

腹中饑鳴

窶人三日不舉火向隣家借米坐未定腹中亂鳴主人曰此何聲也窶人曰腹中饑鳴耳一稚子在旁鼓掌曰煩你再做幾聲狗叫窶人辭以不能稚子曰你腹中既會雞鳴難道口裏邊倒不會狗叫

梅花主人

姚藥巖先生者我郡之老名宿也不矜門第絕口從未道及外家之顯赫賦性雅淡著述等身庭內老梅一本與先生同壽枝幹蒼勁花開爛熳先生因自號爲梅花主人敗屋數椽紙窗零落硯瓦一片折足交床三四張

游人至者殆無虛日家貧不能宴客任客借觴於此數十年來如一日烏先生年登耄耋不出戶外予亦時時臥病謝絕賓客以致至交契濶徒以文字應酬而已今春忽聞溘逝因策杖往哭之但見總帳空懸家徒壁立梅花凋謝鳥語喧然爲可哀也已偶得句云花落不聞人笑語堂空惟有燕來回懸知夜半中庭月猶照文星步紫苔又爲撫棺而慰之曰人生五福先生得其四焉所欠者惟富耳不知富能養身亦能殺身乎殷鑒不遠千古同慨先生有知可以無憾矣

丐莖名娼

木瀆妓者錢三性喜淫不擇人而交爲鄉里所賤惡因



遷於姑蘓之濂溪浜又暗與偷兒丐者通事漸彰著聲  
名大壞無論富商大賈即僕隸下人俱羞與之來往歿  
之日羣丐聚而哭之因各出錢以葬於鴨腳浜上又爲  
之標其墓曰名妓錢三之墓每於仲秋花月之夜羣丐  
各攜酒漿奠之名之曰秋月哭錢三較之宋時諸妓之  
春風弔柳七不同爲千古風流佳話乎

一日三潮

一日三潮爲我郡之吉兆歷歷不爽如康熙辛未歲一  
日三潮瓏巖戴有祺先生及第康熙戊戌歲一日三潮  
瑁湖王頊齡先生大拜雍正乙巳歲一日三潮提憲高  
其位先生大拜富貴實由天定豈人力所能強求者哉

人瑞

汪鷗亭太翁讀書飽道富有文章一生不樂仕進年近  
八旬誥封河南道御史舉案齊眉子孫繁衍五代一堂  
金甌無缺真 聖世之僅見者也予作摸魚兒一闋贈  
之其詞曰問何人十分全福先生豈有誰匹鬢齡獨占  
騷壇蚤壓倒一時元白楊子宅結交盡雕龍繡虎文章  
伯蘭蓀繞膝玉樹長新枝香風拂座瓊屑滿瑤席 桐  
川地時有往來姑射重門又列朱戟神仙富貴真堪慶  
五代一堂怡懌霓裳拍聽不盡鈞天且醉青田核齊眉  
合璧看子復含飴曾還抱子奚羨餐松柏

數有一定



凡人吉凶禍福俱係前定不可一毫勉強或數年以前或旬日之內必有預兆人自不察耳中庸云禍福將至善必先知之不善必先知之故至誠如神大凡人能清心寡欲原有是必知之理非必直至至誠而始知也予一生恬淡凡未來之事俱能得之於影響豈謂前知哉猶憶二十年前丁亥歲亡兒允諧去杳後至己丑歲往吳門娶妾泊舟登岸私心自忖必得一佳讖為妙忽聞兩人云只愁弗養弗愁弗長心頗嫵之及萬氏娶歸直至六年後方生兆熊無災無害今已長大漸漸可以成立矣然後知數有一定非意見之可以預料者也

### 教子

人家子弟到十三四歲時筆下有近於舉業者則教之舉業若不近舉業者當令其先讀經史後涉獵諸子百家事親教之以孝事君教之以忠交友教之以信優游歲月自成大器出亦可處亦可何必拘拘舉業為哉

### 顯親揚名

世俗見人家子弟偶爾僥倖遂羣然譽之為顯親揚名孰知有大不然者夫士人律身行己步步都照聖賢做去窮則獨善其身達則兼善天下使天下後世指而目之曰此某人之子某人之孫然後可謂之顯親揚名也今僅以舉人進士當之不亦大可笑乎

### 弄璋稱慶



戴雲門年先生係辛未鼎元有祺胞弟癸巳浙江副榜  
考授縣令歸來閉戶潛修同人推爲文匠年四十忽遭  
喪明之痛鬱鬱者久之隔二載如夫人喜得一子親朋  
作詩稱慶予亦填沁園春一詞賀之其詞曰天賜熊羆  
庭茁蘭蓀君真快哉念投懷占吉大夫松茂試啼知俊  
君子蓮開共慶充閭羣瞻聳鵠預卜他年公輔才美璋  
後見昂昂千里蹀躞龍媒 仙居原近蓬萊今設矢懸  
弧莫浪猜看玉芽珠顆錦綉褁角豐眉秀義植仁栽  
寶母濺羃燕姬徵夢嶽降俱從世德來真堪賀喜鳳毛  
似續麟趾追陪

官民兩利

均田均役前婁令李公復興及令史馬若來之良法美  
意 聖祖時撫臣題准在案奉行已久官民兩便此真  
萬世之利也在位者宜守此成法切不可爲吏胥蠱惑  
作散役之計斯可矣何則夫均田均役者人各有田不  
拘多寡獨立甲戶漕米地丁銀兩亦各自完納在上  
易催而在下易辦也若一經散役勢必改亂章程混淆  
冊籍張冠李戴在在生波細民之有十畝五畝零星花  
戶圖棍必另立詭戶捆作一甲點一捆頭使零戶有銀  
無處交納捆頭獨受鎖封朴責之苦圖棍如狼官差如  
虎串通婪詐頃刻破家而正供反不能賠辦矣圖棍估  
其家計一無出產然後索其謝儀央官差託總書細開



甲內零星欠戶另發牌票復給摘差圖棍又同原差及摘差按戶索詐正供未及完而室中先已蕩然矣兒啼女哭雞犬不寧鎖挈朴責道路嗟嘆歿亡相繼妻子漂流土地荒蕪人煙寥落吏胥飽欲死小民饑欲死雖有善於催科之官長恐未能設一良策以清此國課也散役之害如彼均田均役之利如此後之君子又豈可壞前人之良法哉無如奸胥圖棍喜於變亂良法以滋弊端將捆戶之法易於催科誘惑官長幸在位者秉心塞淵明見萬里痼瘼念切憂養情深灼知役事一散必至上誤國課下累民生徒飽圖棍胥吏之腹而官長之考成恐亦未能免不若均田均役之法官民兩利也

### 大家子弟

人貴自立父兄之勢不可恃也況父兄之官職實於已無與也苟在盛時不能自檢多其僕從美其衣冠甚至傲慢尊長得罪鄉黨及其門衰祚薄衆共鄙之不齒於士林之列此時欲求爲平民而豈可得哉爲子弟者可不猛省一番以免後悔

### 賢令罷官

雍正三年春捐蘇松每年額銀四十五萬兩著爲定例民困得蘇兩郡有更生之樂雍正四年冬新令王君係昔年提臺王公幼子蒞任婁邦仁心爲質士民安焉至五年三月間不料其誤聽掌家之言傳東房將官銜名



帖向各業戶索本年新餉甚迫知予往年三月全完索之尤力不得已於親友處挪借全完同夏東房錫臣親賫赴縣櫃又未設蒙王公禮意殷勤即着東房同往西倉衙署中交納總書施惟賓彈允批發繳單又送入縣衙用印親筆批設櫃給串隔三日聞已設櫃着人將繳單倒串櫃書輾轉支吾不肯換串復俛總房施東房夏將繳單屢次代稟開門係掌家把守又堅拒不傳耽閣直至秋初意謂候此番設櫃時可以換串矣孰料櫃未設而印已摘去乎所恨者予係歸田老生寒氊片席豈能當此巨創人皆曰王公此舉上負朝廷下玷名聲殊爲可惜予曰不然王公本是賢令此皆由於掌家串通衙役作弊萬端戕賊良善以貽累主人實非王公之過也未幾撫軍命試用人員內蕭公來署縣事滾單復至予又借貸全完一年兩餉萬事掣肘愁窘之中恒多牢騷不平之語旣而自解曰譬如浮糧再遲數年捐免亦可以稍慰矣

不合時宜

予受一年兩餉之累或曉之曰君莫愠設或緣事受罰當更如何予曰一生謹守法度非禮弗爲每年三月白銀十分全完十月後漕米顆粒無欠閉門教子不與戶外從無一刺干謁官長有何可罰或曰稱仁講義總屬空言說孝談忠亦云僞託嚴以訓子少年之英氣消磨



廉以律身晚歲之榮華凋謝丁餉春初納足累區差之  
生意半荒漕米顆粒全完害漕總之折乾無策總總不  
合時宜有何不該罰予曰敬聞命矣然不知究竟該罰  
在何處或曰罰你個不合時宜

騰文不閱

兆熊院試出場回家騰試藝呈閱予曰不必閱也工夫  
在平時至於場中風簷寸晷只須信手寫去足矣得之  
不得自有命在兆熊退或曰何為不閱予曰意欲揚之  
恐驕其志欲抑之恐敗其興不若不閱之為愈也

請看好樣

鄉邨人家多畜吠狗夜則司門以防匪類晝則游行自  
在偶逢一熟識人來必搖頭擺尾繞身環匝狂躍不已  
及去猶勞勞數聲有不忍遽別之狀空明子見之嘆曰  
如此畜類尚要親近好人可以人而不如狗乎

賓主宜交倣

富貴之家延請先生訓誨子弟為先生者或不能以禮  
自持非失之於太柔即失之於太傲均非師道之所宜  
然者也更有可異者初到館時諄諄啓迪雖聖人之誨  
人不倦無以加也及到夏間悠悠度日反自嘲曰何有  
於我哉入秋後意欲改圖奔走道路如窮人之無所歸  
歲云暮矣長吁短嘆嬾於問答又似不屑之教誨也者  
如此弟子安能有成哉又有一等以弟子為大老官極



力趨奉居常則代作文字臨考則傳遞懷葉騙其財物  
百計鑽營偶獲前列便誇於人曰教亦多術矣愚徒之  
高標我之功也轉而欺其主人曰令郎文字可以出而  
問世矣主人亦將信將疑繼而將錯就錯在至親好友  
面前亦大言不慚曰小兒文字頗頗去得蒙有司俱拔  
之前列迨後馬脚敗露然後歸咎於先生之誤人不淺  
也但先生欺不識字之主人此先生之過也若主人畧  
識幾字畧通文理何至受先生之欺而不知察此皆由  
於主人之好諛而甘於受欺也始則甘於受欺繼且并  
欲借先生之諛以欺人甚至惡聞先生之直言者矣此  
又主人之過未可專責之先生也然又有先生與主人  
意氣不投以致造言生事毀謗其主人遷怒於弟子者  
亦或有之觀人者不可不細加體察

### 提憲忠誠

崇明鎮臺陳公戊申孟春來署松江提憲下車之日合  
郡歡聲如雷未及數天 聖主即有浙江全省提督之  
命叅戎郡邑官長及紳士兵民愛之戴之借寇無由如  
失慈母然總之陳公爲政恤兵愛民竭誠事 上不由  
勉強本之性生真國之元老堪爲心膂之寄者也將來  
之繼高公諱其位雍正三年大拜而起者其在斯人乎

### 門冬異名

同一麥門冬也士人種之則名之爲書帶草僧家種之



則名之爲頭陀草何其精當不刊也予今欲兩易其名  
士人種之則名之曰頭陀草此之謂推墨而附於儒僧  
家種之則名之曰書帶草此之謂援儒而入於墨

譚君風雅

嘉定青原譚君名燧一生力學鄉黨推重向與家樸邨  
徵君孫松坪太史交好特甚南巡時獻賦先帝極  
爲激賞錄用史館因丁艱回籍服除不復入長安道上  
寄情詩酒高尚其志家無斗筲不顧也與予雖地隔百  
里晤對稍疎然意氣相投音問時達佳章見贈者甚多  
予愧未能報李也今錄其近作七律二章於此云一代  
龍門望不輕得官何必盡公卿風清李泌神仙骨人重

張華博物名茗椀登堂無俗客籃輿扶路有門生蟬魚  
不食長生字閱遍巾箱眼倍明一業在千秋正未央漢  
儒經義宋文章時無曹輩堪同社誰與先生特置鄉化  
雨恩膏宜遠佈寒氈宦味亦粗嘗掌珠一顆光如月長  
照丹山老鳳翔二

士人貴謙

文體有二十四種時文不與焉今之讀書者不過學爲  
時文而已問所謂二十四種者茫無以應也僥倖遇着  
盲試官拔置榜上遂羣然諛之曰此名士也此文匠也  
無識者又從而和之而彼竟泰然居之不疑矣不知此  
輩清夜自思亦知愧否



卻病良方

疫症大行寒家無一人病者或曰有何妙術得此平安予曰不難解也炎涼消盡寒熱自不能相侵况余一生愛冷全家化之何處得此熱病來

富貴何常

予自十一歲遷至郡中先兄曼園公纔中已酉北榜此時虹橋宋氏兩先生兄弟仕宦勢熖薰天農山王太翁鶴沙許太翁卻非王太翁見山顧太翁繹堂沈太翁釜山周先生蘭陔陸先生硯山施先生蓼菲張先生或以德勝或以名著或以位顯或以富稱後又有玉符楊先生謾園高先生丙章戴親家聯翩繼起俱極一時之盛

其餘不可枚舉六十年中子孫之大振箕裘克紹先業者固多然陵谷變遷風景蕭條者亦復不少可勝浩嘆自其極盛者言之瑯琊三八座去世之後子孫之候補候選及生監等甚衆即現在科第在朝在籍尚有八人先兄少宰公去立之後子弟之仕宦及候補候選并生監等甚衆即現在科第在朝在籍亦尚有六人兩家可稱全美然而由今追昔局面已大不相侔矣至如京標字號在昔則有若吳若朱若張等數十家目下雖盛衰稍異而廢業者過半典舖在昔則有若汪若黃若戴若胡等數十家今皆化爲烏有即僅存一兩家亦不過奄奄一息不絕如綫予年始七十而目之所見者如是不



知更十年後又當何如也

文無定價

文章從無定價所以秀才中學問有勝於舉人進士百倍者不過是命有高下耳後生家偶爾僥倖豈可妄自尊大意氣凌人傲慢故交畏見正人君子徒為有識者所竊笑慎之慎之有則改諸無則加勉

無縫天衣

表姪王印川少年力學標幟文壇南面百城獨有千古真儒林之瓊樹後學之津梁也予今春適逢七十初度承惠七言集句律詩十四首宛如無縫天衣使人贊嘆欲絕今錄其全稿於此其一云僊風入骨已凌雲蘇漢

代文章賈董醇虞集古瑟調高人不撫韓愈青松歲久色逾

新歐陽修雪山童子應前立劉禹錫蓮府公卿拜後塵許長

與 聖朝開壽域陳充綠楊紅杏滿城春楊巨源其二云城

臨南斗慶雲霞李義甫應是壺中別有家張泌玉塵清談消

白晝歐陽修珠盤承露餌丹砂李康成瓊章定少千人和沈

期銀燭長搖半夜花元好問西望瑤池降王母杜甫異香先

引七香車劉禹錫其三云蓬萊仙闕海門通劉滄許椽全家

道氣濃李商隱錦擲鮮鱗紅潑刺王禹偁舞嬌春席雪朦朧

羅隱桃花盡日隨流水張旭柳葉開時任好風杜審言舉座交

歡祝眉壽張門故應宛轉為君容蘇軾其四云春在先生杖

履中蘇軾祥雲瑞氣覆堦濃王涯紅穿道室爐丹熟皇甫曾雪



暖瑤杯石髓融

張說

寶篆時薰蘭麝薄

毛震

露華偏濕葑

珠宮

戎昱

仙家未必能勝此

王維

三月鶯花付與公

蘇軾

其五

云獨開封檢試砂牀

陸龜蒙

兔走烏飛不覺長

韋莊

德望舊

懸霄漢外

姚鵠

才名常帶粉闈香

韋渠牟

花前白酒傾雲液

蘇軾

天上琅璈送壽觴

王禹偁

記取羲之洗墨處

蘇軾

同人永

日自相將

張南史

其六云梓里衣冠不乏賢

杜甫

聖朝求

舊鄙鳶肩

蘇軾

才微易向風塵老

郭震

道在寧憂雨露偏

許渾

奇石盡涵千古秀

羅鄴

異花長占四時妍

沈傳師

稱觴獻壽

香霞裏

溫庭筠

海上先聲入管絃

蘇軾

其七云直觀滄海過

東萊

蘇軾

玉署深嚴枕斗魁

楊萬里

勝事肯教饒沈謝

陸龜蒙

在情誰是舊陳雷

元稹

仙禽本就華山出

劉禹錫

天馬應從

渥水來

張仲素

更有倍深知感士

李咸用

鶯歌度曲繞仙杯

李適

其八云夫子工文絕

李太白

水為心地玉為儀

褚亮

撐

腸正有五千卷

韓翃

不朽纔消一句詩

司空圖

囊簡久藏科

斗字

蘇軾

追歡最數牡丹詩

陸游

瑤池宴罷歸來醉

韋莊

待與

飛仙乞隱芝

許渾

其九云一時冠蓋盡嚴終

蘇軾

瀟灑名儒

振古風

許渾

已謝印書辭北闕

王安石

卻思丹徼伴冥鴻

陸龜蒙

蒙

風雲暗發談諧外

曹唐

儒雅皆歸德教中

家逢慶樂

盧綸

固應難與俗人同

陸游

其十云陳實人傳有

好兒

楊巨源

一時驚喜見風儀

劉禹錫

池邊寫字師前輩

高駢

葉上題詩寄阿誰

顧况

莖露曉傾千歲酒

曹唐

祥光夜吐萬

年枝

許景光

殷勤為作宜春曲

韋莊

鴻入高冥鳳在池

張退

傳



其十一云江南江北浩煙波劉禹錫誰是神仙張志和蘇軾

松逕定知芳草合李羣玉山齋喜與白雲過錢起宮梅間雪

祥光繞閻朝隱薜荔成幃晚靄多裴迪珍重先生全太古譚用

之鏡潭長與月相磨蘇軾其十二云羣仙相望在瀛洲胡宿

三素雲中侍玉樓李商隱金鼎調和天膳美王建碧桃開盡

海山秋宋祁年年只見人空老白居易日日悲看水獨流王昌

莫道神仙不可學范成大人間亦自有丹邱韓翃其十三

云和風助日應韶年陳義星降人間夢已傳司空曙一嶺桃

花紅錦黥杜牧萬絲楊柳綠生煙韋莊地仙亦是三千歲盧綸

時論同歸尺五天杜甫自顧下儒何以祝羅隱祝君眉壽似

增川蘇軾其十四云綠水青山雖似舊耿滄人生七十古來

稀杜甫江聲不盡英雄恨陸游僊嶠浮空島嶼微李白梁國遺

風重詞賦錢起荀家燈火有餘輝趙嘏唯公福壽無勲德文彥

博紫鳳啣書次第飛李山甫

### 上巳觀漁

今歲戊申上巳係予七十初度自念一生既不能立德

立功以表見於世但能衣租食稅為天地間之一蠹民

雖享大年徒增媿耻所以前此先力辭親友之祝壽一

則兒幼無知一則年老多病恐應酬失禮反滋罪累潛

往他處避賀不得已也二月二十八日率兆熊兒至先

君墓所掃松展拜畢然後從盤龍塘渡春申浦至三林

鎮高祖曾祖祖父塋前展禮隨命兆熊兒往德福橋先



室吳孺人墓前化紙事竣登舟復渡春申江泊舟百步  
橋下初二日黎明由龍華過七寶往北行經籐山一帶  
天氣晴朗可愛楊柳桃花夾岸農家婦子嬉嬉犬吠雞  
鳴在在點綴於水邊籬下宛如妙手寫桃源圖一幅上  
巳日放舟澱山下攜兒入三姑祠登龍淵橋觀通靈泉  
其餘古蹟杳不可得箕山一點在西北隅石骨峭露其  
旁堪爲遁迹之所又命舟子移舟湖中作觀漁之想但  
見水天莫辨雲霧蒼茫漁舟數十艇鼓浪而來席帆斜  
挂若雁翅排空聯絡天表衆籟寂然一白萬頃眞所謂  
別有天地非人間較之曲水流杯不遠勝乎因謂兆熊  
曰以此爲老人壽豈非大快事哉

### 農家孝友

唐洪海者予家之佃戶也住浦南世業農其父生二子  
長洪海次洪儒父歿之日洪儒不及三齡洪海撫之苦  
掙肥田百畝又建房二所及洪儒年長爲之婚娶將田  
房均分洪儒辭不敢當洪海曰父蚤歿止有兄弟二人  
撫養不周猶不能無遺憾些須田房敢有輕重乎弟辭  
不獲而受焉及兄歿弟服斬衰三年以報之以視世之  
欺孤奪產者不亦大可風哉

### 天道難欺

我松學差三人廖最富黃小康王不待任滿而告假養  
親歸家後廖遭巨罰黃在不議不論之間王雖貧而頗



得美譽天道之不可欺有如此

華學名師

華庠筆峰周先生諱大璋以名進士作宰龍陽二年不耐齟劇求改教職上臺重其人高其行題准改授松郡華亭縣教諭下車之始即能鼓舞生童振興文教講道談經正學術以端士品將來繼稼書陸公而起者其在先生與

罷侯盡職

山陰念吾周公治罷二載極意撫綏使民共享太平之福後濬吳淞江不虐民不苛派夜深猶循行工所壩崩溺水而殞上臺交章奏聞天子嘉焉錫以太僕正卿

加以祭葬蔭一子 皇上之念勞臣如此周公亦可以含笑於九京矣

感舊

連年坐病筆墨久疎回首故交十不存一當時承贈佳章雕鐫無幾敬藏篋笥以貽子孫新春淫雨浹旬偶爲檢出已爲鼠狼嚙殘大半悵惋久之今將完好者亟付梓人以無忘雅愛爰錄十九條刊之於左

王仁鎬字京容華亭縣人也少年力學夙號能文言坊行矩出自天性餬口硯田不爲貧困其真君子人也予愛而敬之爰錄其贈言七絕四章於此其一云江左詞章勘定評紛紛壇坫強爭盟少陵有句猶能記自得隋



珠覺夜明其二云微渺重開衆妙門挽回大雅此編存  
昌黎有句猶能記世上何人可共論其三云幽夢雖頻  
跡卻偏何期會合一樽前東坡有句猶能記喜入燈花  
欲鬪妍其四云乘興還須物外游曲江原是古丹邱放  
翁有句猶能記風月佳時事不休年家世晚生王仁鎬  
拜藁

陸柱字石公華亭人一生好學博極羣書著述等身籟  
金莫付家無斗筭不受人憐與予交最久知最深時相  
過從偕顧湘九先生稱二老焉今湘九去世而石公依  
然善飯真松蘿之典型也其贈予空明子集序一首今  
錄於此云孔子云有德者必有言詩古文詞皆言也皆

德之蘊於中而發於外者也粵自班馬而來代有作者  
至於唐而少陵集其大成昌黎起衰八代存諸中者皆  
孝友忠義之旨故發於外者有維世救時之風後之人  
無不仰爲泰山北斗非可蹴而至也今讀空明子三集  
觀其詞意博而體裁古一吟一咏短序長篇或敦崇孝  
友或追念交游以及登覽憑弔之作淋漓高老實有關  
乎世道人心直可遠追昌黎少陵信爲有德之言非徒  
以藻麗爲工也余固陋無文非敢強作解人然搜竒探  
奧之餘如拾珠璣百斛所以培風雅而備楷模者固自  
無窮也昔雍正癸卯仲秋平原教弟陸柱藁

金維寧字德藩丙午舉孝廉後授壽州學正因州牧放



馬學宮先生不能卒因訐叅累年罷官歸里著有賀劾  
堂集及垂世芳型併秋谷集數種行世但其爲人使酒  
罵座士林畏之若鶻鷂焉獨與予交必恭必敬從不作  
戲語故其贈言雖多予不敢多錄然其一生儘有真率  
處亦可人也已今錄空明行一章於此云空明子空明  
旨趣何所指虛室生白是空明方寸錦囊囊天地縱讀  
空明詩爍目歎觀止凌空句落碧秋天秋月空明照秋  
水秋水空照月空縣兩空暎帶空莫擬縣象著明空天  
邊象即是空明水底是空是明疇識之空明張子猷叅  
此妙諦叅來拈作詩詩腸靈駛何如矣芝秀堂開蘭更  
馨益蘭甚盛蘭譜朋儕水鏡比水鏡比比空明賓主雲集笑

言清清言玉屑人都晉詩翁敲句金作聲青蓮危坐樂  
嚶鳴衆賓羣聽叶和子長康八十神靖爍手把空明詩  
卷竟日賡賡一曲曲中紆迴旋轉如盤谷賡百篇篇中  
清雄奔放如飛泉蘭亭修禊三春將莫來朝上巳今春  
再度鶯嬌柳鞦韆遲日暄良辰重臨酬良晤主人乘興整  
郇厨盤餐釘餽渾無數鶴膝犀渠薄上公金鰲玉海推  
獨步一刻千金較怠勤百城萬卷融今古夕陽西沉醉  
言歸醉眸一路滿芳菲漁翁不解空明趣依舊蒹江守  
釣磯丙申又三月二日偕顧湘九李次鄴及諸同人集  
景老年長兄臺芝秀堂縱讀空明詩集遂留卜晝因作  
空明行以紀之錄呈笑正并謝金維寧拜草



馮萱字龍孫五玉先生之曾孫家貧甚以館為生幾不能自立投予一章未幾謝世今見其詩想其人亦可哀也已爰錄其詩云先生當代文章伯讀破萬卷貫經籍蚤歲名場輒冠軍老儒英少俱辟易幾回挾策試秋闈誰知獻璞終遭刖最後天人對 大廷崇川海邑膺師席表揚節孝培士氣婦女老幼咸加額未及一年即挂冠歸來三徑守安宅膝下寧馨方六齡朝詩暮書手不釋萱也同里未登龍偶然進謁幸親炙慨承惠我詩與文捧歸快讀忘晨夕詩境空明文亦然里言上報謝師益年家晚生馮萱拜草

姚詮字殿颺婁縣歲貢生候選教諭與予為總角交老

成持重然諾不苟所可慨者年至古稀尙未有子一生著作付托何人今錄其為予作空明集序一首云虞書曰詩言志太史公曰詩以道意苟無其意何以有詩清河六先生以空明名集義取諸此也夫意有高下有淺深無以下者為高無以淺者為深俾讀之者有一唱三歎之聲有含英咀華之味斯其用意也為獨精若夫以工部之雄鍊學者易失於粗供奉之英竒學者易流於淺他若微之香山東野閬仙之輩其人皆冠絕後代而輕濁寒瘦猶不能無弊若此宋元以來體格且已分途運用豈能合轍有明風氣迭遷自高楊以下復有李何至於王李揚鑣海內宗之雲間尤甚然而剽竊率易人



不能不厭其浮廓者勢也轉而瑣碎枯寂人不能不厭其粗疎者又勢也甚矣作詩之難也夫作詩難作詩中之樂府更難自虞廷賡歌肇起而後有古詩三百篇其被管弦而播金石者莫不有律呂相調與宮商相協焉迨漢帝設協律都尉乃有樂府之名一時蒲稍天馬及房中諸歌導揚美善潤飾弘猷者極一代之雅歌而樂府以傳顧樂府者有其詞也而協以音有其音也而協以律非苟焉而已矣漢魏以降雜以悲歌慷慨而樂府之體未純泊乎五代流蕩滋甚其體亦寢薄矣有唐一代以詩賦取士一時聰明才智之士各出其心思各寫其性情其詩歌稱最盛然取前人舊題改爲近體其於

樂府之式亦有未盡合者初唐諸賢如沈宋開風氣之始古詩最多而樂府不概見盛唐如李太白杜子美元次山中唐如白香山諸詩人皆長於歌行然終自成其爲古詩未可卽以爲樂府非以其律呂之未相調而宮商之未盡協與甚矣作詩難作詩中之樂府更難也持此論以讀空明之詩集知其意之所之氣之所感識之所至力之所注宜其味之愈深而愈厚格之愈雅而愈純也雄大如泰山喬嶽高華如朗月縠星冶豔如翠繞珠圍清素如冰肌玉骨輕遠如風纏露灑幽閒如菊秀蘭芳悲涼如九寡之琴淒淒切切歡娛如八音之奏嗶嗶鏘鏘何其有兼備而無偏枯也美矣大矣蔑以加矣



風雅正宗其在斯乎吾不知世之塗澤語言粉飾規模  
自以爲作詩者亦曾讀空明先生之詩而遊其門登其  
堂探其源流悉其奧義否已亥夏日教弟姚詮拜

金炳別號珠湖高郵州人由武甲科授崇明守君性好  
吟咏善談易理每出巡海外三月爲期必以百章見示  
真輕裘緩帶一代之儒將也予回崇日曾刊其贈言二  
首豈料別後因公望悞不終厥任乎後至我松承枉顧  
時又贈二章今錄於此秀野橋邊綠野堂伊人宛在此  
中央清河閶闔聲名重瀛海詩書惠澤長貞節表揚惟  
解橐英才教育盡成章泥塗軒冕根天性笑傲林泉出  
繡腸仁義悅心徵百行醇醪醉客隔三霜著書立說驚

華藻毓桂培蘭兆吉祥媿我浪遊勞且苦羨君高隱壽  
而康今朝再得瞻芝宇頓慰相思喜欲狂珠湖小弟金  
炳拜草

汪宓別號琴川姑蘓人善彈琴愛篇什擔簦負笈來游  
子門投詩一章以當贄其詩云自天地開闢而人生其  
間秉間氣者異正氣爲聖賢周孔既超拔釋老亦淵淵  
代有至人出往往探其源生亦頗好道猶以管窺天晉  
謁張夫子展示空明編旨微而理妙悟對渾忘言如彼  
鏡湖月靜夜中天懸如彼辟塵珠纖埃不能沾守茲無  
中有遂得玄中玄卷之不盈杯舒之滿大千夫子養其  
真又能操其全所以動合道萬事信手拈懷寶寧自棄



用舍由自然畧出試牛刀武城動歌絃方族素稱蠻感  
化無半年春風遍桃李德澤沛海川一朝賦歸來萬姓  
如沸蟬攀轅借寇公擁駕未得前稍展經濟才政績已  
足觀若使登臺閣何有調梅鹽抱此公輔材閒居富詩  
篇導引吸日精安爐煖丹田矯矯餐霞姿巉巉海鶴顏  
俯訓後學人上追赤松仙小子領玄誨至今服拳拳俚  
言二十六韻恭呈空明老夫子兼求教正虞山晚學汪  
咸拜橐

蔡隱修字景正號顯之己酉舉北榜孝廉才高意廣松  
之少年名士也丙午館於予家兆熊從之遊多所取益  
今錄其庚子贈章一首云淵明解組賦歸來三逕松筠

手自栽詩卷乾坤長不朽釣竿鷗鷺莫相猜一軒風雨  
樽中滿半壁煙霞洞口開更羨鳳毛年正少能書突過  
右軍才晚生蔡隱修艸

李如泌字次鄴號節珊李襄愍待問之文孫爲人特立  
獨行不和於俗與予稱第一知己乙未歲投予四章未  
曾授梓今偶爲檢出不覺有物在人亡之痛因錄於此  
其一云君家遺澤好傳經竹箭東南世所型每數雄文  
高藝苑頻來問字到雲亭藏名惟有投詩社玩俗何妨  
戀釣汀妙諦閒中時悟徹塵紛久已薄浮萍其二云祥  
鸞曾傍上林鳴恬澹紫桑處士情會有玉函藏俊句更  
搖銀管疊新聲閒心縹緲惟君適壯志紛紛任世營暇



日過從每剪燭一宵清話已相傾其三云縱橫手役千家秘礮落胸羅百代寬龍尾硯穿成舊集烏絲紙滑出新刊時因得句招良晤更約尋僧問古灘已悟升沉造化訣春旗秋醕足爲歡其四云光怪探奇龍象雄崔盧族望更誰同憐君抱僻仍高價笑我浮槎屢轉蓬覓句知從天姥授看花好待豔陽烘不辭瓦礫輕投贈欲枉瑤華挹惠風晚生李如泌州

黃熊徵字如九崇川之老諸生也工於詩家本富因好吟而貧貧而詩益工善詼諧喜飲酒邦之學吟者宗焉其序予空明集曰嘗聞詩之爲道所以陶寫其性情也有唐三百年以詩取士獲雋者不知凡幾而可傳者寥

寥不過數百人李杜詩篇反不與制科之選乃知此中三昧作者固難識者亦不易今空明張夫子以天縱之姿沉酣典籍無以閎閱家聲青錢命中何難掇巍科取高第而竟安於時命不肯詭遇競進七入鎖闈兩以首卷特薦得而復失者再遂焚棄帖括廁身月露之林側足風雲之府上自風騷蘇李下至王李鍾譚無不鉛黃油素辨其烏鵲故其爲詩也比物流連鏤肝琢腎時而爲枯禪時而爲豔婦時而爲壯夫韻士時而爲俠客游仙以及屠沽樵牧之流六博蹋鞠之技無不就身因境寓之於詩發洩其胸中塊壘數百篇中有類唐之初盛有類唐之中晚或古氣磅礴或蘊藉多風或正言莊論



或嬉笑詼諧如白地光明之錦罄無不宜又如景星卿  
雲光怪陸離千態萬狀而不自知其所至豈非藝苑之  
宗工詞林之絕品也乎或曰吾子許夫子之詩誠當矣  
人竊議阿私所好可奈何余應之曰子不聞越蜀之犬  
乎越吠雪蜀吠日今吾夫子之詩竟謂越之雪蜀之日  
可耳或笑而退余遂書之以爲序受業門人黃熊徵頓  
首百拜撰

楊蘭玉字舜年崇川之門人也弱冠入泮時縣試府試  
院試皆第一邑中呼爲小三元少年落拓不羈恃才傲  
物與人多忤終不能得志於場屋予歸里後渡海來松  
投詩一章多牢騷不平之語殊亦可喜其詩云吾師高

範世罕儔落落千古空王侯風神散朗誰可挹灑如玉  
樹臨清秋吳下阿蒙迥不如不材擯作空山樗吾師帳  
下曾一顧撥開雲霧青天覩以此春風坐不窮真賞獨  
契希元風公門遍栽桃與李李花自白桃自紅君不見  
冀之北土產驪駒病瘦伏櫪鳴啾啾汗血空塗車下坂  
駿骨當望誰人收吾師此意誠感激百川赴海齊東流  
信哉吾師高範世罕儔門人楊蘭玉百拜艸

朱霞字耕方號初晴文章學問爲世標準誘進後生多  
所造就予七十時承作序言一首今特錄出於此其序  
云有入世之壽有出世之壽固筋骨勤吐納聰明不衰  
受子孫之利養此入世者之所謂壽也守清靜樂虛無



休止深山或大海島歷千萬歲此出世者之所謂壽也然此皆有意於壽者也若夫無意於壽而壽卒不能與之竝者則有之矣山嶽之亘於地松栢之生於林皆未嘗有意於壽者也未嘗有意於壽而人之稱壽者輒比之曰山嶽曰松栢世之爲壽者果若是班乎然則比人於山嶽於松栢者皆妄也皆諛也世有於松栢之壽稱觴而祝之者乎無有也然則人之可比於山嶽可比於松栢者其不在於稱祝之口也明甚空明先生少而俊爽長而通方解組歸休著作等身傳經令子則入世者之壽莫備於是屏絕聲色呼吸精和年登古稀神明彌旺於老氏

專氣致柔之旨有默契焉而不屑談坎離鉛汞之術則出世者之壽又莫過於是然而先生之不欲以壽稱何也夫千古之善言壽者莫如孔子孔子曰仁者樂山而推其旨曰靜故能壽此非山嶽之說所自昉乎又曰歲寒然後知松栢之後彫也此非松栢之說所自昉乎夫靜者之能壽此必靜者而後知之非靜者固不知也歲寒之後彫此必歲寒而後知之未歲寒固不知也夫不知山嶽松栢之何以壽而但以山嶽松栢比先生宜先生之不樂受也然則先生之壽宜何如曰山嶽本無意於壽而世之爲蟻丸爲蟻封者自不能與之偶松栢本無意於壽而世之爲朝菌爲日及者自不能與之爭則



先生之所自得者必有在矣先生其何以教我空明先生七十大壽不受祝叙即請教定九卦學人朱霞予仕崇不及一載而崇之士民何其愛我之深久而弗諉也崇治舊屬揚州俗尚淳龐僻居海外不爲蘇松習氣漸染故其民風士行猶存古道焉憶予解組之日士民公送泰山氣象及崇庠諸生送人倫模範二匾同欲釘於明倫堂上以風繼起予再四辭之不獲載之歸家又送長生位於文昌祠內與鎮臺魏公同留遺愛更欲樹碑學宮垂之永久予辭以有干功令決不敢當歸里後隔五載諸士民渡海而來以碑文呈覽予謝之曰尸位數月抱疚滋深予卒辭焉諸士民怏怏而別然其

情固不可沒也今將碑文錄之於此云傳謂人生三不朽而立德居其最斷無有德足以入人而不動於公好者然尤惟事後之思去而彌永相與致其親承色笑之慕殆猶一棠長在力圖其所以留之者而情又烏能已已清河景翁老師負德望爲雲間鉅儒昔維康熙五十八年夏奉簡爲吾崇司訓初下車而瞻師之道貌者咸叱爲奇蓋師之性量宏而氣質莊重與色厲者去霄壤士多敬畏之下車後而挹其清輝聞其快辨又如春風化雨之被使人鼓舞而不知其所以然也旣乃見諸設施動多異績首最以革弊爲要凡諸生謁見之儀幫補之費與夫告假等陋規悉痛除之而不恤夫後來之



能堪與否以此見師之德固已渥矣不寧惟是嘗厚出其貲以分給夫士之寡且貧者而絕非有所強而爲之惟其慷慨好施皆德度中事若以之市譽者豈能壘壘不倦如此師又全體中和剛柔並用者也未嘗侮鰥寡而畏強禦故一切無禮之事當之而不撓有不啻鷹鷂之逐而人人以爲快意至於多方培養而士骨猶存頻舉獎揚而頽風可挽皆秉鐸中之空前絕後僅一見於今者他若課士之暇時而敲枰佐韻時而擊鉢催詩間取夫庠之有文藝者而陶寫其性情然皆是天真別趣非濫觴於風雲月露之章曾獲示空明全集捧而讀之而益驗夫有德者必有言其信然已意謂師之經綸大

具雖區區一席不妨爲牛刀之試顧於宦情獨淡微特生平不喜熱官抑不戀此清曹也甫及春告歸梓里遂以解組師之節行何高崇何不幸之甚歟迄今距師之歸已歷五載崇之人士猶不忘師之德而時或詠歌之嗟嘆之其甚手之舞足之蹈而莫非出于心之不自已者此非事後之思倍篤於親承色笑者耶於是追慕而思所以永存之凡我同志靡不踴躍爭先用勒貞砥以垂不朽壽師之德兼以著我儕之公好云爾

張雲章字漢瞻號樸村嘉定人讀書明道事親以孝聞文章德業經濟洵爲一代全人久寓都下名卿大人多尊禮之暮年徵入史館事竣議叙不受職而歸一時推



重著有樸村子詩文集行世憶自己未應 召枉道來  
別泛舟泖澱陳湖而去寄予三章今錄於此云暮春日  
自茸城將抵吳門泛舟三泖口吟長句寄景桓賢仲先  
生并請和政山郭初開慘澹雲日晴風暖澱爲紋峩峩  
鬢髻青含影拍拍鷓鴣白作羣縹緲一竿煙外寺瀟湘  
六幅草如裊回頭笑問空明子魚蘊涼波可共分自泖  
湖歷澱山陳湖竟日有風波之恐作詩遣懷二首并附  
正生長東吳煙水鄉蛟宮鼉窟詎潛藏一颿高挂風雲  
去萬頃閒隨鷗鷺翔飛絮悠颺沾不到孤村依約盼何  
方只憑忠信爲肝膽自哂餘年涉渺茫又云澱湖纔過  
又陳湖竟日中流擊楫歌遠樹帶烟分浦溆暮山沉碧

失嗟峨低飛鳥雜輕帆雨狎浪婆爭湧海波欲結五湖  
終隱計釣竿何處穩漁簑嘉定樸村子雲章

何英字雄飛蘇郡人云係岷瞻諱焯之姪持刺請見兼  
投七律一章予適不在家闈人辭焉不獲謀面然想其  
人大約少年之有才者也今錄其詩於此其詩云崇川  
夫子望彌隆學貫天人主靜功氣象光風垂道範文章  
名世仰儒宗課頻玉樹青燈下德貯金甌碧罩中待澤  
行看天下雨林泉未許久噉噉龍津晚生何英拜藁  
沈龍翔原名默字興之揚州人癸巳孝廉與崇明令君  
張文英同年張公徵之修志不日告成雖其中稍有欠  
斟酌麴然其才亦一時之雄也後張公陞任雲間郡侯



沈君亦至其投予七律一章云夙仰高名自海疆先生司訓

崇明教思流播余客海上耳名最熟 摠衣今始得升堂三朝耆舊尊遺老

八斗才華屬俊郎令子八歲能文 著述等身千載業雲山經用

一時香先生空明子集尺許其中 阿咸叨共芝蘭譜未

敢論交抗末行先生猶子煜與余同舉癸巳京兆 里言奉贈空明先生

老年叔郢政小姪沈龍翔拜草

袁魁號文侯崇川之副總戎也力能挽十石強弓虎頭

燕頤具封侯之相工詩文善書畫富經濟真一代之人

傑也已酉仲春介予門人陸大經執贄于予予辭之再

三終不能卻其勤學好問之意禮賢下士之誠焉可沒

哉予雖不敏請即以爲燕臺之郭隗又奚不可今錄其

回崇後寄詩一章於此自從 簡命戍崇疆久矣傾心

芝秀堂何幸登龍瞻大老不須題鳳識賢郎羣推宗匠

經綸富朗誦新詩齒頰香坐我春風相見晚庭前玉樹

更芬芳又孟秋陞任毘陵協鎮有寄懷一章并錄於此

一棹扁舟過五茸春江二月記登龍韓潮蘇海文章伯

霽月光風理學宗幾許東山眠別墅肯教彭澤撫長松

何年絳帳承明訓操杖從遊躅九峰鐵衣門人袁魁再

拜具藁

唐三英字我求號實夫華亭人讀書作文老而彌篤其

贈予數章今錄其一於此云曾讀瑤篇大集中才逾博

物晉司空流芳孝友清風遠寄傲尊鱸逸興雄鸞鳳揆



天光不定斗山垂象望彌崇近聞小阮頻稱頌咫尺龍  
門若可通唐三英拜藁

陸大經原名智字用貞予初至崇尙未識面偶見其登  
蓮花峰七律一首不覺擊節嘆賞遣人邀致遂成金石  
之交忘年之契自庚子歸里越二載壬寅春渡海而來  
投詩十首真可稱耐久朋矣其來詩云玉振金聲集大  
成靈思妙筆總無倫消融兩晉痕俱化貫串三唐意更  
新龍馬圖中窺至理霓虹句裡識天真雄才不獨空江  
左今古騷壇第一人其二云舌底波瀾筆底鋒皎於秋  
月秀於松毫端光怪驚風雨紙上雲飛起蟄龍霞散赤  
城橫海甸珠分合浦照心胸幾回西溯崑崙水源遠流

深識所宗其三云句噴雲霧挾風霜歐冶鎔成十丈鉞  
韓氏氣機蘇氏勢杜家武庫謝家塘擎天辟立羣山仰  
沃日波翻百谷王文炳摩空高北極頓教星斗夜無光  
其四云不矜才調不沽名聊借文章寫性情鼓盪乾坤  
存正氣撐持宇宙作長城蘇門似聆孫登嘯緱嶺遙聞  
子晉笙筆快思隨何所似春花爭發水縱橫其五云奇  
文獨闢晦蒙開總是空中明處來翕闢渾忘涵萬象日  
星炳蔚照三才追風逐電橫天宇驅雨鞭雲吼地雷最  
是無心成妙語雜言都半入詼諧其六云詞場文陣慣  
搴旗海外歸來句更奇五色筆花無過夢一池春艸有  
餘思牙籤插漢三都賦砥柱迴瀾百世師昨入寶山空



手返枕中玄秘未曾窺

去冬拜謁老夫子至小除日始返棹歸家

其七云鐵

板銅琵琶氣象雄一聲唱出大江東奔騰如瀉黃河水縹

緲遙登紫極宮讀到殘燈來夜月吟成花底落春紅如

何十萬琳琅句過半當年付祝融

夫子著述等身自甲午歲檢出付之祖龍

茲集乃三十其八云闡揚潛德發幽芳一筆羲書姓氏

香烈魄貞魂歸夜月金心冰骨淬寒霜栽培元氣邦家

福推廣天恩風俗良感激歿存旌片語

夫子獎家伯母節匾給鏡

絕點蓬門千載有餘光其九云風流如許六朝空減字

偷聲入化工戛石敲金珠絡索雕雲鏤月玉玲瓏春酣

大泖湖烟碧潮長三山海日紅任是陳王誇八斗也應

對此拜雄風其十二云不淺靈源碧漢槎茫茫何自測津

涯離奇變化還過易溫厚和平總是葩十二冊吞三泖

秀五千言

夫子葺城賦言約五千有奇

奪九峰華波斯玄圃經遊遍

獨倚春風醉紫霞壬寅春王五日焚香靜坐啜茗澄心

恭讀空明老夫子大集不禁喟然嘆曰文至此蔑以加

矣理奇而法情正而葩風雲月露總歸佳句嬉笑怒罵

盡是文章如地如天宛矣箭韶九奏無烟無火依然閬

苑羣仙進退百家沉酣六籍千古一人洵不媿與經也

菲材一辭莫贊十律賦呈以深仰止還望老夫子進而

教之受業門人陸大經百拜草



張景桓家乘私志

自高祖考嘉靖甲申季冬起至雍正戊申暮春止共計總數二百零五年

空明子曰家乘之作豈徒然哉前此必有畸行可傳或功德及於民物者然後可以表而出之也我高曾兩世積德累仁及我王父力行善事不求人知屋漏無欺衾影不媿箕裘大振貽厥孫謀迨乎先君及從父荆花暢茂子孫眾多濟濟衣冠遂成望族未及百年宗支繁衍漸漸貴賤不同各立門戶有登堂而考其自出有叩門而不獲一見在已則已炎矣於人毋乃涼甚豈祖德之隆至此而遂衰乎抑亦人事之未盡乎故予於戊子歲設義米以聯絡之更為之墓埋以存恤之二十年中稍存親親之意但恐日遠日疎



譜牒莫考或本宗認作通譜或他族冒為一家亦未  
可定故予不敢廣為搜羅祇就五服宗支以內直書  
在系罔置褒貶不過欲使後之子孫有所訂証而已  
因作凡例五條於後

一高曾祖考畧書一兩言使子孫有所考據

一兄弟子姪輩但書世系履歷餘俱不叙

一五服宗支以外及有過削籍者俱不收錄

一年幼尚未取名或地遠未及知名者俱以圓圈

標之

一祖姑姑母姊妹已女及姪女姪孫女等與榮在

五服以內者俱存之於各房名下

張景桓五服以內宗支考



一世至五世直系圖

世一 方 三子

世二 光邦 一子

世三 尚禮 一子

世四 一元

耀邦 二子

尚文 三子

淇 四子

復 四子

集彙 鱮 梁 茶 葉 榮 茶



輝邦 二子				
尚義 三子			昌谷 一子	
溥 二子		鳳祥 二子		澧 三子
湄 二子	鳳翼 二子	浚 一子	椿 棟	桂 枚
樞 模 楷 機 椿 棟 桂 枚 果 案 檠				

五世以下直系圖

彙 一子				
維煦 三子				
梁 三子				
照 一子				
夢徵 一子				
夢喈				
夢旋				
夢鰲				
三燮				
重熙				
景星 七世				
德山				
○ ○				
柱				



菜 二子

應龍 一子  
師實 二子

培本

菜 二子

煜 四子

若水

菜 二子

燿 一子

培忠

榮 二子

堯

若采

菜 一子

焦 一子

塾

榮 二子

勳 一子

光圻

榮 二子

斐然 二子

光墀 一子

果 四子

熊 五子

光均

榮 二子

熊

光坦

榮 二子

燾

光在

榮 二子

燾 二子

光城

榮 二子

熙 一子

光堅

榮 二子

熙 一子

光圮



枚 一子  
桂 三子

棟 二子

椿 二子

機 二子

烈 一子

煨

煙

燎

炳 一子

關 一子

焯

炆

炆

熾 一子

張景桓清河五服以內宗支叙傳



予小子生長雲間躬逢 盛世所恨者僻居海角聞見

不廣行年七十一事無成家乘不修亦可愧也回憶高

祖以前適丁倭亂遷徙靡寧譜牒散失傳聞異詞文獻

罕徵豈無差誤予生也晚才短力微與其遠而難稽不

若近而可考今祇就榮身五服宗親起見稱呼服制以

榮為主上而高曾下而子孫各書世系使後之雲仍猶

可窮源溯本弗敢過為文飾使他人之竊議其後也作

清河五服宗支一卷有識者鑒之

高祖考

高祖考子敬府君諱方別號心塘年幼時適丁倭警避



迹筠溪謁懷棠陳公見而器之曰是必能昌大厥宗者  
遂中東床之選娶懷棠公姪女爲配一生相敬如賓鄉  
里推重後徙於三林鎮之南街府君生於嘉靖甲申十  
二月初六日卯時歿於萬曆丁酉十二月二十八日酉  
時陳太夫人生於嘉靖庚子七月二十四日寅時歿於  
萬曆丙辰十一月二十四日未時生三子長華春公仲  
可交公季振宇公

曾祖考

曾祖考可交府君諱耀邦幼攻舉子業娶都給事芋西  
儲公姪女府君不事生產遨遊四方家亦中落迨本  
朝以曾孫集貴 誥贈光祿大夫吏部左侍郎儲太夫

人 贈一品夫人府君生於嘉靖戊午四月十三日丑  
時歿於崇禎戊寅九月二十九日申時太夫人生於嘉  
靖戊午十一月初一日未時歿於天啓丙寅九月十七  
日戌時生二子長從周公次伯玉公

絲麻尊屬

曾伯祖考華春公諱光邦娶康孺人生一子元明公  
曾叔祖考振宇公諱輝邦娶葉孺人生二子長伯時公  
次仲際公

祖考

祖考從周府君諱尚文娶文學趙公之女府君因聞李  
闖直逼京城崇禎被難一慟而亡太夫人享年八十有



一府君幼敦實行屢舉飲賓堅拒奔女暗室弗欺代償  
叔逋見義必爲種種善事載入省郡邑志獨行傳中以  
孫集貴 誥贈光祿大夫兵部左侍郎趙太夫人 贈  
一品夫人府君生於萬曆丙戌七月二十四日巳時歿  
於順治甲申七月十二日申時太夫人生於萬曆辛卯  
二月二十五日酉時歿於康熙辛亥七月二十三日寅  
時生三子長筠齋公仲東臯公季有芑公四女長姑母  
適趙公無子二姑母適陸公生一子一女三姑母適周  
公生二子青年守節奉 旨建坊旌表孫彛康熙丁丑  
入翰林四姑母適王公無子一女

小功尊屬

叔祖考伯玉公諱尚義娶陳孺人生三子長靖菴公仲  
叔明公季飛濤公

絲麻尊屬

伯祖考元明公諱尚禮娶康孺人生一子君實公  
叔祖考伯時公諱昌谷娶蔡孺人生一子君亮公  
叔祖考仲際公諱昌會娶陸孺人生一子呂臣公

先考

先考東臯府君諱復一生博極羣書不樂仕進車轍所  
至題咏殆遍娶吳太孺人先外高祖雲訥公入贅外家  
張氏故子孫亦有張姓者府君生於崇禎戊辰二月二  
十四日子時歿於康熙戊辰九月初五日寅時太孺人



生於天啓丁卯十月二十六日卯時歿於康熙戊寅二月二十七日卯時生四子伯芳苑仲蓋修叔景桓季齊軾一女適婁庠生陳麟書生一子映璿

期服從父

伯考筠齋公諱淇莊敬嚴肅言笑不苟娶陸太夫人以子貴 誥封光祿大夫吏部左侍郎陸太夫人 誥封一品夫人歿後各賜祭一筵陸太夫人生一子曼園側室錢太宜人生三子長茹英仲和叔季奕山陸夫人生三女長適太學生蔡履泰生四子二適太學生趙臨遐生二子三適州同知高與時生一子錢宜人生一女適六合縣教諭葉司直生四子

叔考有芑公諱澧倜儻多才中年而殞娶吳太孺人生三子長雅臨仲端宸季松友一女適監生許殿良無子

小功再從父

伯考靖菴公諱溥娶趙孺人生二子長維吉次維新一女長適監生趙鴻友生一子次適吳師古生一子

伯考叔明公諱鳳祥娶金孺人生二子長隆吉次介眉一女適監生王天錫生四子

伯考飛濤公諱法娶翁孺人生一子亦辰四女長適太學生陳國友無子二適婁縣庠生王禹昌生一子三適州同知姚敏中無子四適監生顧振芳生一子

絲麻三從父



伯考君實公諱一元娶薛孺人無子

伯考君亮公諱鳳翼娶陸孺人生二子長文徵次文若  
叔考呂臣公諱渭娶黃孺人生二子長辰如次天如

已

景桓名榮娶吳氏東臯公第三子松江府學生員壬戌  
年補增廣辛未年援貢至戊戌年十月授崇明縣儒學  
訓導已亥五月二十四日到任明年庚子三月二十六  
日告致歸里嫡無出妾徐氏生一子壩萬氏生一子兆  
熊徐氏生一女適龍巖戴公第二子浙江嘉興府嘉興  
縣太學生晴江生一子一女

期服兄弟

芳苑諱蔡娶薛氏東臯公長子太學生授職州佐於康  
熙辛卯年亡生二子長應龍次師實三女長適婁學庠  
生宋文樞生二子二女次適監生陸子襄無子三適太  
學生徐若干生二子

蓋修諱棊娶陳氏東臯公仲子太學生候選州判早天  
生二子長煜次煜

齊軾諱棊娶袁氏東臯公第四子婁縣附學生援貢再  
娶董氏生一子焦三娶許氏無出康熙甲申年亡

大功從兄弟

曼園諱集娶王氏筠齋公長子青浦學生員捐貢生中  
已酉北榜舉人丙辰成進士任行人辛酉陞監察御史



甲子內陞兵部督捕理事官丙寅春轉僉都御史冬陞  
戶部倉場右侍郎又二年陞吏部右侍郎隨轉左侍郎  
庚午丁內艱回籍連丁外艱癸酉服除甲戌以兵部侍  
郎 召用在任八載壬午移疾歸里癸未七月中病故  
歿後 朝廷賜一品祭墓墓上海縣之富豐莊 誥封  
光祿大夫兵部左侍郎王夫人 誥封一品夫人王夫  
人生一子棠一女適丁丑翰林雲南開化知府吳臨章  
生二子四女妾徐氏生一女適瑁瑚王公第四子恩蔭  
生王德公生二女

茹英名彙娶王氏筠齋公第二子華亭學生員捐貢生  
初任刑部主事陞戶部員外郎陞刑部郎中告假在籍  
以子貴 誥封翰林院侍講學士王氏恭人早年而夭  
亦疊受夫子 誥命生一子照

和叔名維煦娶王氏筠齋公第三子婁縣學生員捐貢  
生中壬午科南榜舉人以子貴應得翰林封典然因十  
上公車青雲未遂猶思一逞以冀晚成所以婉辭 誥  
命嫡無出側室吳氏生一子夢徵又庶生二子長夢階  
次夢旋 當日伯父筠齋公曾命長兄曼園公撫  
之爲子故名從火輩今歸正木字行

奕山名梁娶戴氏筠齋公第四子婁縣學生員中壬午  
科南榜舉人癸巳開科成進士候補中行評博嫡無出  
庶生三子長夢鰲仲三燮季重熙  
雅臨諱祭娶周氏有芑公長子太學生考職州同知康



熙庚子年七生二子長勲次斐然

端宸諱宋聘沈氏有芑公次子未娶而夫婦蚤夭

松友諱果娶趙氏有芑公幼子太學生考職州佐雍正

癸卯年亡趙氏生二子長熊次燾庶生二子長熙次烈

一女適桐鄉學庠生朱子研

小功再從兄弟

維吉諱枚娶龔氏靖菴公長子太學生考職州同生一

子煥

維新諱桂娶王氏靖菴公幼子嫡無出庶生三子長煌

仲煙季燎

隆吉名棟娶慕氏叔明公長子太學生生二子原配生

炳續娶趙氏生關昱

介眉諱椿娶趙氏叔明公幼子原配無出續娶蔡氏生

二子長焜次炳

亦辰諱機娶周氏飛濤公子生二子長炳次熾

絲麻三從兄弟

文徵諱楷娶楊氏君亮公子

文若諱模娶唐氏君亮公子

辰如名樞娶朱氏呂臣公子生二子

天如名柱娶盛氏呂臣公子生七子

子

壘字允諧聘高氏景桓之子蚤夭



兆熊字延年別字秦松聘汪氏景桓子五齡能書大字喜吟咏至丙午歲刊小言集一冊前此同人有六齡贈言之作辛丑年巳登梨棗戊申又刊時菽試草一卷

期服姪

應龍字魯亭芳苑兄之子娶何氏金山衛學庠生援例入太學原配生三子有過削籍在縣存案庶生一子培本二女未字

師實字介山芳苑兄之子娶曹氏青浦學庠生雍正乙巳年亡生二子長元堙次元塙三女長適戴允和二適蔡正源三未字

煜字昊霑蓋修兄之子娶王氏婁學庠生援例中癸巳

開科北榜舉人候選知縣生四子長若水仲若莢叔若金季若采一女未字

燧字伊章蓋修兄之子娶于氏太學生生一子培忠續娶顧氏生二女未字

焦字南炎齊軾弟之子娶許氏未壯而天生一子塾

功服姪

棠原名維烈字南映曼園兄之子娶吳氏再娶吳氏婁縣學生員捐歲貢生中丙子科南榜舉人四上公車丙戌補戶部員外郎尋轉刑部郎中庚寅夏出爲桂林府知府壬辰陞副使道回籍養親 聖祖時捐助駱駝銀兩以充邊用雍正五年分因 皇上下大發帑金遣大臣



開濬東南河道萬民歡忭自念年老不能出任父子兩  
在食祿無可報効祇有捐助河工銀兩以稍酬 君恩  
於萬一幸 聖主嘉納錫之以京堂太僕寺少卿職銜  
以示恩寵 君恩之隆渥如此兩吳恭人皆受 誥命  
嫡無出庶生二子長景星次德山四女長適貢生吳策  
勲生三子二適監生吳士筠三適候選教諭李坤四四  
適太學生王玉禾 當日伯父筠齋公曾有以孫爲子  
之說故名從木輩今歸正火字行  
照字得天茹英弟之子娶高氏再娶馬氏婁縣學廩生  
援監中戊子科北榜舉人己丑成進士入詞林散館授  
檢討 聖祖時南書房辦事十有餘歲今 上登極之  
元年陞左春坊左贊善再陞翰林院侍講甲辰春補癸

知正科典試閩中乙巳春陞侍講學士丙午典試雲南  
兩娶俱受 誥命俱無出今又續娶沈氏生一女

夢徵字鶴來和叔弟長子娶楊氏太學生中甲午科北  
榜舉人戊戌成進士入詞林散館陞授編修楊氏亦受  
雍正元年 誥命嫡無出庶生一子○○

夢階和叔弟第二子

夢旋和叔弟第三子

夢鰲奕山弟長子

三燮奕山弟第二子

重熙奕山弟第三子

勲字書竹雅臨兄長子娶楊氏松江府學生員捐貢生



生一子光圻聘鄒氏未娶而卒  
斐然字與能雅臨兄次子娶沈氏婁庠生援例考授州  
同生二子長光堉次光墀一女許字府庠生林坤平  
熊字渭占松友弟長子娶汪氏生五子長光均二光坦  
三光在四光坤五光城

燾字淑洙松友弟第二子娶曹氏生二子長光厘次光  
堅

熙字庶咸松友弟第三子娶趙氏生一子光圮  
烈字植庭松友弟第四子聘王氏

絲麻姪

煥字南輝維吉兄之子娶王氏

煌字丙文維新弟長子

煙維新弟第二子

燎維新弟第三子

炳字虎文隆吉兄長子娶瞿氏生一子

關昱字麗中隆吉兄次子娶趙氏生一子

焜介眉弟長子

炳介眉弟次子

炳字景咸亦辰兄長子娶王氏

熾字赤文亦辰兄次子娶吳氏生一子

功服姪孫

培本魯亭子



元堙介山長子

元堯介山次子

若水字虞恪昊霑長子聘華氏幼而能文無工雜作

若菴字玉蟾昊霑第二子

若金昊霑第三子

若采昊霑第四子

培忠字懋人伊章子聘陳氏

塾南炎子

絲麻姪孫

景星字慶初南映長子娶王氏

德山字恩仲南映次子聘王氏

○○鶴來子

光圻書竹子聘鄒氏早夭

光堉字雲耕與能長子娶周氏婁縣例監生生一子

光墀字玉立與能次子娶吳氏早夭

光均渭占長子

光坦渭占第二子

光在渭占第三子

光坤渭占第四子

光城渭占第五子

光厚淑洙長子

光堅淑洙次子



光圮庶咸子

時

雍正六年歲次戊申暮春上巳日雲間歸田布衣七十  
老翁空明子張榮景桓氏識

男兆熊

姪孫若水

全校字

哀挽諸君姓氏

朱棟 秉士桐村

吳光睿 念廬錦江

沈廣輿 騶士吳興

姚弘啓 子文金山

李如泌 次鄴華亭

蔣天錦 觀我婁村

張雲章 樸村練川

趙炎 雙白福建

張永銓 玉英上洋

金維寧 德籓谷陽

顧諏牧 旁臯茸城

陳言章 含美錢涇

柳璜 渭公菱村

董鉉 漢留瑤河

岑巘 青巖南陽

錢栢齡 介維澱山

張琳 佩嘉錢塘

孫鉉 思九青浦

趙和 柳介花溪

盛晉 悔亭申江



釋真智自策

釋寂綏隱能

空明子題詞

雍正六年戊申暮春適丁子古稀之歲予老且病不耐  
酬應惟有潛身遠遁迢迢物外游行九峰三泖間者旬  
日旣歸無聊靜坐一室偶檢舊笥得二十年前壘兒著  
有程學的派纂一冊歷朝賢君便覽一冊歷朝奸相便  
覽一冊丙申歲曾刻過張允諧時藝遺稿若干首附空  
明子四書經文之後現存笥中者尚有二千餘首當時  
諸名宿痛其玉折有傳誅哀輓之作又若干首披閱之  
際不覺淚泫泫欲下也嗚呼兒生於康熙三十一年壬  
申歲轉眼之間迄今又三十七年矣回憶曩者歷歷如  
畫予艱于得子嫡又無出兒係庶生之子生時蚤慧愛



若至寶三四歲時即有成人之度一時諸名宿俱以大器期之讀書十行俱下書中大旨不講自明董瞻峴譽之為神童家樸村目之為聖童其為大賢之所推許如此及年漸長而學日富至十二三歲以後理學諸書無不探索十五六歲駸駸乎有任道之意身體力行言笑不苟愛親敬長御下接物一團和氣與世無爭予私幸祖宗積累產此不凡將來造就自可希賢希聖作一代之大儒彼富貴曷足道哉不料一病而殞嗚呼痛哉七兒年止長殤何須立傳然當日諸名宿之心自不可沒也況乎諸名宿在此二十年中無論老少無論僧俗鮮有一存者睹物傷人亦可哀也已因刊壩兒允諧年譜

并刊諸名宿傳誄哀輓諸什於後

康熙三十一年壬申十月初九日寅時壩兒生子予集中  
有一點完全赤子心

康熙三十二年癸酉二歲予集中有汝尚在懷抱何時  
觀古今

康熙三十三年甲戌三歲日能識一二十字予集中有  
出入必與偕恩誼何其切

康熙三十四年乙亥四歲能通大小九歸算法予集中  
有不待教而知慧實羣兒鮮

康熙三十五年丙子五歲就外塾予集中有沉靜本天  
生不肯羣兒逐



康熙三十六年丁丑六歲予集中有總角初成才六歲  
蒙心漸去望他年董瞻岬先生見之有神童之譽

康熙三十七年戊寅七歲讀完四書自能講解予集中  
有教兒好學人家黠莫似而翁老尚頑

康熙三十八年己卯八歲讀五經予集中有欲修天爵  
須由我要辨神奸莫露聰

康熙三十九年庚辰九歲五經讀完客有譽之太甚者  
予集中有未甘責備由來許豈敢求榮望後人

康熙四十年辛巳十歲讀左國史漢予集中有消愁只  
有兒堪教日暮無勞鬼見憐

康熙四十一年壬午十一歲讀八家文閱程朱諸書有

志聖學予集中有過庭遵父訓侍坐承師勉立志頗  
卓然臨文絕敷衍

康熙四十二年癸未十二歲居則端坐出則擇友予集  
中有見汝漸成人未肯讓豪傑相接無雜賓匪交不  
敢結家樸村兄目之爲聖童

康熙四十三年甲申十三歲應童子試予集中有十三  
就試輒冠軍又富貴弗移志賢聖當自箴

康熙四十四年乙酉十四歲隨予往金陵鄉試見其待  
人接物凡事和而能敬予集中有守此忠恕旨培養  
天地心

康熙四十五年丙戌十五歲頗能明理有任道之意予



集中有聖道得仔肩衰宗賴以轉老夫差自喜聊用作消遣

康熙四十六年丁亥十六歲躬行實踐信道益篤予集中有志道不憚勞持已益卑牧涵養及數年義精而仁熟不料九月二十一日卯時病亡予集中有胡天降閔凶蘭玉遭摧剪跣克反壽終回仁乃不免又有予也雖不文與子立年譜更乞名賢作寫子人中龍文中虎今日爲爾刊年譜并刊諸先生之作以了此公案予可以免食言之失子亦可以含笑于九京矣

張允諧傳

允諧姓張氏名壘空明先生長子也日角秀眉聰穎夙著年八歲受五經十二編習子史百家握筆作制藝千言立就不特屈其曹偶即老師宿儒見之咸歎以爲莫可及由是聲稱籍甚空明先生任道最力凡所以訓迪其子者必本於仁義中正不樂與時俯仰爭逐聲利爲事曰我子他日得爲名儒逾於九遷八座遠矣允諧方垂髫克成父志故步趨言動佩服飲食悉以古人自繩固過庭之訓得於濡染者深要亦天性然也遇伯叔兄弟暨往來諸執行能敬而和有問則恂恂起對始終無惰慢之色事師則恩義無盡敬禮有加噫當今之爲弟



子者吾見亦罕矣御下寬中寓肅呼叱不形而童僕奉命不敢少越空明先生嘗笑謂之曰我不逮汝汝何約束而能指揮如意若此乎今年春空明先生患咯血幾月餘食未嘗見其屬厭也寢未嘗聞其帖席也功課之暇則入而請安者日必數起其愛親爲何如哉非誠發於中孰能強之使然哉四年來作文千首皆親編集手抄詩經二冊日摹蘭亭一卷其勤於爲學雖古所云書淫左僻不是過也識者皆以大器期之詎料偶撻泄瀉之疾五日而卒卒時年一十有六傳於童子之能執干戈而猶弗欲殤之也况允諧之宅心制行卓卓如此兼之文采爛然有遠過成人者哉予故從悲悼之餘撫其

梗概而爲之傳以俟知者知焉

贊曰玉產於璞旣雕旣琢何不用於明堂而竟委諸壑珠出於川其光煒然何不留以照乘而忽隨諸淵嗚呼允諧惟汝斯賢何異子之德而奪子之年我不明其故我欲問諸天

康熙四十六年歲次丁亥陽月旣望愚友人朱棟灑淚

和墨謹撰



哀誄言

歲在丁亥九秋 張子允諧告殂於時

尊公景翁先生為之食不甘居不寧悄然以悲諸同人亦莫不驚愕而懷戚相顧牽連徘徊無計乃相與按故事作詩以慰之不過解其嚴父之哀思而已而允諧君之無城寶色照乘奇珍蓋世才華溘焉朝露若無一字之褒誰識英年之美不能已於無言豈敢阿我所好用抽鄙思作為哀誄

粵稽清河遙遙華胄代毓人宗德音是茂禮樂開先箕裘衍後迄於景翁肯堂肯構曲江門第於茲益秀乃產聖童傑出希邁自有典墳富於縑緗疇瘳其哉疇擷其



芳何況弱冠疇坐其旁君於其間沉浸瀆洋方寸胸臆  
二酉比藏自有文章銀管所標人盡窺藩人盡舖糟况  
也綺歲强弩難操君當此日筆海驅濤莊騷左國分路  
揚鏹文通夢綵侍中重席延壽叔皮自可比跡匪茹其  
華無收其實孝友恭儉有典有則緊德與言乃稱不朽  
造物忌公則畱於壽天實不弔碎此瓊玖嗚呼力未具  
全志已求通道之云遠足以先窮物自有宰理莫可究  
棘芟猶敷蘭種不茂朝霞易流靈雨何驟自古才子罕  
登遐壽嗚呼君生後我我出君下恨不及君揚屹風雅  
恨不及君主盟文社君今逝矣誰似君者讀君遺文猶  
見陶冶館客名儒更痛難捨聞訃驚呼各有所寫愧我  
無文亦淚盈把冥冥來格首肯否也  
康熙四十六年歲次丁亥陽月年家眷同學弟顧諏牧  
拜具藁







想是修文猶未竟故教地下遠相求

太師不細語賦題梅林香金對村不世柳共璜渭公

乍聽渾疑夢徐驚凶問傳別來剛數日化去忽千年掌上珠沉海牀頭劍躍淵學餘詩禮在邢忍覩遺編

姚弘啓子文

芝蘭蚤隕每堪悲才質如君更數奇自古仙曹須慧業於今地下愛文詞高堂淒斷雙黃髮同氣凋傷一白眉  
緗帙空堆琴永息書窗依舊憶當時

董鈺漢留

峰泝鍾靈掌上珍墳笮繞膝慰雙親何期僻合不離去我亦花溪舊恨人

李如泌次鄴

造化無全局乾坤有幻圖琪花偏易謝玉樹竟難敷膝下思萊舞庭前失鯉趨親躬悲蚤慧腸斷識之無

岑巖青巖

一夜西風剪玉芝當庭空自泣華滋想從天上爲英物不向人間展藻思雨露多情猶黯淡雲霞得路總淒其有香若使魂堪返莫被荒山草木知

蔣天錦觀我

年來愛爾最惺惺每步長亭更短亭醉我三杯春酒綠對他九點晚山青亂拋竹簡愁無際怕見松煙涕欲零寂寂西風渾不管黃花零落滿空庭



錢栢齡 介維  
豈是尋黃石飄然蛻彩衣  
緱笙何處駐遼鶴幾時歸  
正擬芹香采翻悲薤露  
晞銜哀吟楚些休與大招違

張雲章 樸村

遮莫金鑲再世身  
每憐嬌怯正青春  
琴書知爾傳家舊  
道義於吾結好新  
竹院不來階沒草  
墓門一閉案生塵  
虬江路遠疎存問  
遙望臨風淚滿巾

張琳 佩嘉

天愛竒才奪少年  
不堪堂上淚珠連  
瑤墀諒亦難留住  
定許重來續後緣

趙炎 雙白

韶光黯澹謝家墀  
一夜驚摧瓊樹枝  
慧似童烏年更促  
情鍾夷甫痛難支  
石麟天上終應至  
玉燕懷中定有期  
日暖藍田勤護惜  
堃夫先咏夢熊詩

孫鉉 思九

象勺才何捷文章似老成  
烏衣誇濟美珂里軼羣英  
忽抱西河痛難忘  
羸博情升沉應有定  
珍重莫傷明

張永銓 玉英

我今哭爾淚痕多  
一曲長吟爲爾歌  
石火餘光曾有幾  
金甌一缺待如何  
亦知肯捨無常體  
其奈堪憐不住波  
辜負雙親多少意  
望君重向德門過

趙和 柳介



慘澹秋風繫客思憑軒忍讀悼兒詩悲吟何處腸堪斷  
寂寞書齋月落時

金維寧 德籓

綺歲才華踞上流建安詞賦壓應劉錦衣未耀青雲路  
綵筆俄歸白玉樓笑語誰呼今日伴書聲無復舊時留  
過門紛灑傷心淚添得水壺一水浮

盛 晉 悔亭

夙忝通家舊英年見異姿石麟天上種丹桂月中枝未  
熄燃藜火空留刺股錐凌霄雛鳳翻不耐孽風吹

朱 棟 秉士

髫年嗜古號書癡絳帳傳經彼一時問道真能入聖室

臨文豈肯寄人籬身同羽化何由覓事到心傷總不宜  
祇為西河情倍切相逢那敢復言悲

釋真智 自策

幾度吟君哭子詩忘情野衲亦生悲本期鵬奮雲霄路  
無奈霜摧玉樹枝綵服儘堪憐小鳳德門猶望產靈芝  
從今莫話西河痛且向花前看奕碁

釋寂綏 隱能

燕公忽見二毛侵玉露寒深玉樹林未免有情憐色相  
可知不住本禪心綠筠十畝鶴爭實喬木千尋鶴戀陰  
我是德門摩頂客石麟聞送錫教臨



跋語

兆熊初生在襁褓中即聞允諧兄之名三四歲過庭時  
嚴親常道及之後就外傳讀兄時藝數篇頗覺筆底純  
熟圓轉如輪不忍釋手知兄猶在十三四歲時作也自  
愧愚魯遠不能及今戊申春予亦年十三矣嚴親搜檢  
舊笥得讀諸先生傳誄哀輓鴻篇益知兄之志趣不凡  
卓然自立遊於聖人之門駸駸有登堂入室之望惜乎  
年之不永天若有以限之宜乎嚴親當日有喪予復喪  
予之嘆也予雖不及親見兄之行事猶能於此卷中想  
像兄之潛心聖學莊敬嚴肅和易豈弟之象私心向往  
以爲座右之師資云







